

CACA CHE DIRUN SAN PABLO, DECHUH YE YAHN IHyan YAHN DENDIOHS CHE VATE YE YAN ROMA

1 ¹U Pablo, che tendahnun Dendiohs u, che dín ntiyon yahn Dihvo vo Jesucristo man, che co apóstol man, che cuahndudó ndudo ndah yahn ye man ne, dirún caca cuh yahn ne.

²Yahn ndudo ndah min ne, a chihco cade Dendiohs nan Ndudo ndah yahn ye nde a rahn me, dirun ihyan profeta yahn ye. ³Ndudo ndah min ne, rahn yahn Daya ye, Dihvo vo Jesucristo, ihyan min che chihndeyan ye van ndata yahn David.

⁴Numacuahn vederihquentiyon yahn Vaco Ndah yahn Dendiohs ne, ntuche ye van tenahn, ne nduco chemin chihnde ro che Daya Dendiohs ihyan. ⁵Che cuande yahn ihyan min ne, din yahino Dendiohs nuhn, ne a tendahnun ye nuhn che co nuhn apóstol, cuahndudo nuhn Ndudo yahn ye van ihyan nducuahn nación, cava che nevahnecon ye, ne cotahno ye. ⁶Van ihyan chahn ne, nchuhn che a nedin yahn Dihvo vo Jesucristo nchuhn, ne nduco ne ndi cuande ne, te a tendahnun Dendiohs nchuhn.

⁷Nchuhn, ihyan yahn Dendiohs che yahino ye nchuhn, vate ne yan Roma ne, dechuh caca cuh yahn ne. Chido vo Dendiohs man, Dihvo vo Jesucristo man, din yahino ye nchuhn, din ye che ndahca cuahtenan ne.

Pablo ne, nahn cahñ ye yan Roma

⁸Numachahte iyehnse ne, a chetuhn ndudo yahn nchuhn, nduhca che ritahno ne Dihvo vo Jesucristo. Chemin che

menan vihca che cuande yahn ihyan min ne, reneçah nundihve cuahn Dendiohs çava ne. ⁹Dendiohs, ihyan min che redín ntiyon yahn ye numa inó, rahndudó ndudo ndah yahn Daya ye ne, devano ye che cuahn dama reváh çava nchuhn. ¹⁰Ricá ihyan che atanoca nduh ne, cuahnecon ye che chí quendihcheró nchuhn, ¹¹te ama nahn chí quendihcheró nchuhn, çava che dín che cuahtenan cuma ne vederihquentiyon yahn Vaco Ndah yahn Dendiohs, ne tahque numa ino ne cotahno ne Dihvo vo Jesucristo. ¹²Avane ne, náhn che necah yan ama tamo vo chedave yahn vih, yahn che ritahno vo Dihvo vo Jesucristo.

¹³Dihnó, ráhn rí nchuhn te ama ndeh yune nahn chí quendihcheró nchuhn, ne cuahndudó ndudo ndah yahn Dihvo vo Jesucristo, nduhça che redín van ihyan nación chenahn, çava che din Dendiohs che co yahn ihyan, cotahno ye dama nduco nchuhn. Ate nde meniyon ne, hua ri che chí. ¹⁴A chihquentiyon Dihvo vo Jesucristo u che cuahndudó ndudo ndah yahn ye van ihyan yahn nducuahn nación, van ihyan devano man, van ihyan tundo man. ¹⁵Chemin che quenán inó che a nun cuahn chí van nchuhn che vate ne yan Roma, cuahndudó ndudo ndah yahn ye, cahnevan ne.

Vederihquentiyon yahn ndudo ndah yahn Dihvo vo Jesucristo

¹⁶Hua ri cuihnán yahn ndudo ndah yahn Dihvo vo Jesucristo, te chemin che vederihquentiyon yahn Dendiohs, çava che ndedevahn ye nducoyaca ihyan che ritahno ye, menan vihca ihyan nación yahn Israel, namin ihyan nación chenahn. ¹⁷Ndudo ndah min ne, a vederihquentiyon yahn Dendiohs, te a nan ndudo min rihco ro ye che reneçah yahn ye nducoyaca ihyan che ritahno ye, nduhça che a ndirun nan Ndudo yahn ye tuhça: “Ihyan che ritahno ye ne, ndo yan Dendiohs nduco ye, nedin yahn ye ihyan, ndevahn ye.”

Nunde yahn ihyan

¹⁸Nahn che cotahno vo, te a devano vo che Dendiohs, ihyan min che va ye vahchetero ne, din ye castigo yah nducoyaca ihyan nunde che rahcotahn ye yahn Ndudo yahn ye. ¹⁹Hua ndahça che tihça rahcotahn ye, te a devano cuaco ye yahn vederihquentiyon yahn Dendiohs, yahn che a man Dendiohs

cah ye, checadino ye. ²⁰Nde ro che dendah Dendiohs iyehñse ne, a devano ihyan te ihyan min che Dendiohs, ne quenan cuma ye vederihquentiyon cuahn ðama, te tumacadino ye duh ihyan min, yahn dehtenduh che dendah ye. Chemin che nde metah deh che cahma ye, çava che ndedevahn ye ihyan. ²¹Andahre a devano ye che va Dendiohs, ate hua rendeva ye yavenan ye, nde hua renecah ye nundihve cuahn ihyan. Tahque ndah ye ne, rendedecadino ye yahn dehtenduh che nde hua richihve, nto ye ihyan tundo. ²²Andahre ama devano ye, che rahco ye, ate nde hua renahn ye. ²³Ndotenan che ndeva ye yavenan Dendiohs, ihyan min che va ye cuahn ðama man, che ama chahte vederihquentiyon yahn ye man ne, rendeva ye yavenan dehtenduh che redendah man ye, rentave ye ihyan iyehñse man, ite che chenán cun cah te man, yahda man, cu man.

²⁴Chemin che chacondah vedame Dendiohs ihyan chahn, çava che quendi ye yune chihnga yahn ye, cahtera ye vedecuihno yahn ye van man ye nduco vih. ²⁵Ndotenan che quendi ye yune cuaco, ndeva ye yavenan Dendiohs, ihyan min che dendah ye iyehñse man, rendeva nducoyaco vo yavenan ye cuahn ðama man ne, quendi ye vederihncheh, rendeva ye yavenan dehtenduh che man Dendiohs dendah ye.

²⁶Chemin che chacondah vedame Dendiohs ihyan çava che quendi ye nunde yahn ye nduco vih, cahtera ye vedecuihno yahn ye. Ihyan ndahta ne, ndotenan che cahnevaco ye, cuahtenan ye nduco inchahn ye ne, rahtenan ye van man ye nduco vih, rahtendihco ye nunde. ²⁷A namin no tun ihyan chahn. Ndotenan che nuhn ye ndahta yahn ye ne, rihtera ye vedecuihno yahn ye, rahtenan ye van man ye nduco vih, ne nduco chemin recah rihn man ye ihyan, rihco yan man ye castigo che va che co ye.

²⁸Nducote hua chihco ye chedave yahn ye che nevahnecun ye Dendiohs ne, chacondah vedame Dendiohs ihyan çava che quendi ye vederendedecadino chihnga yahn ye, cuahtendihco ye nunde. ²⁹A ndedecuihta man ye nducuahn nan nunde, chendihco ye. Ndere rahtenan ye nduco ihyan che hua nihnevaco nduco ye man, ndere rahtechica ye man, chenán cuma ye vede idihya man, vedeve man, vedetan man, vederihncheh man. Cuahnde chende ye man, vate

canda ye nduco vih man, rihno ye vih man. ³⁰Chihnga rahn ye yahn vih man, rahcotahn ye yahn Dendiohs man, hua renevahnecun ye nde ama ihyan man, redin yade ye man, redin cun ye man, rendedecadino ye deman yahn dehtenduh che chihnga man, hua renevahnecun ye indihthe yahn ye man, ³¹hua renahn ye man, hua redinahn ye ndudo yahn ye man, hua renan vahino ye vih man, hua devano nchahco ye yahn vih man. ³²Andahre devano ndah ye vederihquentiyon yahn Dendiohs che ihyan nunde ne, va che co ye castigo yahn nunde yahn ye, ate riquendi ye rahtendihco ye nunde, nde tuno rendonan ye combiero yahn ye che dama ri ye nduco vih.

Dendiohs ne, techecade ye numa cuaco

2 ¹Nducote a devano nducoyaca ihyan che va che co ihyan nunde castigo ne, adecoduhno ihyan che rendahchenan ye ihyan chenahn ne, nde nan che cahma ye metah, te a dama ri ye nduco vih, rahtendihco ye nunde. ²A devano vo che dama no redin Dendiohs castigo ihyan che rendahchenan ye. ³Nchuhn che rendahchenan ne ihyan nunde chenahn, ate dama ri ne nduco ye ne, hua rahco ne che ndevahn ne yahn castigo yahn Dendiohs. ⁴Hua ducherino ne vedechahtino yahn Dendiohs man, vedeyahino chahte yahn ye man. A devano ne che quenan cuma Dendiohs vedeyahino nduco ne, te nahn ye che nto ino ne nunde yahn ne. ⁵⁻⁶Ate nducote redin cheche ne chedave yahn ne, hua nahn nto ino ne ne, redecuihta ne nunde yahn ne. Man ne vedin ne, te techecade Dendiohs yahn ne numa cuaco, ne va che co ne castigo. Nda ro min ne, techecade ye yahn nducoyaca ihyan, tunoca che nedin ye ndahtenan ye iyehmse. ⁷Ihyan che chahtino ye, redin ye che ndah man, chenah ino ye che quendah yavenan ye man, che ndeva Dendiohs ihyan man ne, a ihyan chahn che cuahtenan ye vahchetero numacuahn ro. ⁸Ate ihyan che canda tin ye man, che rahcotahn ye yahn ndudo cuaco man, che riquendi ye yune chihnga yahn ye man ne, quenah cuma che din Dendiohs castigo yah ihyan. ⁹Nducoyaca ihyan nunde yahn nducuahn naci6n, menan vihca ihyan naci6n yahn Israel ne, chuhrihn ye, din Dendiohs castigo ihyan. ¹⁰Me ihyan nducuahn naci6n che din ye che ndah, menan vihca ihyan naci6n yahn Israel ne, ama ndah ro yahn ye man, ndeva Dendiohs ihyan man, din ye che ndahca cuahtenan ye man.

¹¹Tihcā, te Dendiohs ne, quendihconahn retechecāde ye. ¹²Nducoyāca ihyan che chendihco ye nunde, che nde hua devano ye ley che dirun Moisés ne, ndiyu ley min che cahcantiyon castigo che co ye, ate va che co ye castigo. Namin nducoyāca ihyan che a devano ye ley min, ate chendihco ye nunde ne, va che co ye castigo nduhcā che rihquentiyon ley min. ¹³Tihcā, te atenān ihyan che redinahn ye ley min, che ndo yan Dendiohs nduco ye, nedin yahn ye ihyan, ndiyu ihyan che ndere rihnevan ye. ¹⁴Cuahn che ihyan nación chenāhn, che nde hua devano ye ley min, redin ye nduhcā che rihquentiyon ne, a ndero ndi che redinahn ye vederihquentiyon yahn Dendiohs, andahre hua devano ye ley min. ¹⁵Nān nducuahn che redin ye ne, rihco ro ye che anduhnecā ndete che renevahnecun ye ley min. Nāhn cuān ne, renda yahn ye che cuahtendihco ye nunde, ne va che co ye castigo. Nāhn cuān ne, renda yahn ye che hua co ye castigo, yahn che rahco ye che hua chahte nunde yahn ye. ¹⁶Nda ro yahn ne, quenān cuma che cahcantiyon Dendiohs che techecāde Dihvo vo Jesucristo nunde yahn nducoyāca ihyan, nde nducuahn nunde che chahtendihco ye cuāhn ndeh.

Nunde yahn ihyan nación yahn Israel

¹⁷Nchuhn ihyan nación yahn Israel, hua dehva co yahn ne, che rahco ne, te ndichahtino ne ley che dirun Moisés. Redin yāde ne, rahco ne che yahn Dendiohs nchuhn. ¹⁸A devano ne deh che nahn ye che dinahn ne che rahco ne, ne nducote chahn ne ley min ne, rahco ne che devano tendāhnun ne cha che ndah vān dehtenduh che redin ne. ¹⁹Numacuahn vedeyāde chenān ino ne che devano cacuahn ne ihyan tundo. Rahco ne che āma devano cah cuānde ne ihyan tācā co tuno ye nān Dendiohs. ²⁰Rahco ne che āma devano cacuahn ne nde ihyan che hua renahn ye mān, nde checāhya mān, te a nchuhn che va tāh ne vededevano mān, ndudo cuāco mān, nān ley che dirun Moisés. ²¹Tuhme nducote āma devano cacuahn ne, che rahco ne, ¿me dehra cuānde che hua redinahn mān ne? Nducote rahndudo ne che hua din duco ihyan, ¿me dehra cuānde che reduco mān ne? ²²Nducote rahndudo ne che hua din duche yahn ihyan che a nihnevāco ye, ¿me dehra cuānde che redin duche yahn mān ne che a nihnevāco ne? Nducote

rahndudo ne che hua ndeva ihyan yavenan dehtenduh che redin ye dendiohs yahn ye, ¿me dehra cuande che reduco ne dehtenduh che rigonun chihve che va chete yaco yahn ihyan chahn? ²³Nducote ama redin yade ne che devano ne ley yahn Dendiohs, ¿me dehra cuande che duche rino ne ihyan, hua redinahn ne che rihquentiyon ye? ²⁴Nduco che tihca redin ne ne, a tan renun cah nduhca che a ndirun nan Ndudo yahn Dendiohs tuhca: “Ihyan naci3n chenhahn ne, a cava che duhtuno ihyan nchuhn che chihnga rahn ye yahn Dendiohs.”

²⁵Che chenan seña nchuhn ne, taca hua, richihve yahn ne ndete che redinahn ne ley che dirun Moisés. Ate nducote hua redinahn ne ne, a ndere chenan seña me nchuhn.

²⁶Me ihyan naci3n chenhahn ne, ndete che redinahn ye che rihquentiyon ley min ne, redin yahn Dendiohs ihyan, andahre hua chenan seña ihyan. ²⁷Ihyan che redinahn ye ley min, andahre hua chenan seña ihyan ne, ndahco ndiya ye nchuhn che nde chenan seña nchuhn man, nde devano ne ley min man, ate hua redinahn ne. ²⁸Ndiyu che ndata yahn Israel nchuhn man, che chenan seña nchuhn man, che cochihve yahn ne cava che nedin yahn Dendiohs nchuhn, ²⁹te atenan ihyan che numacuahn chedave yahn ye renevahnecon ye che rihquentiyon Dendiohs man, redinahn ye man, rene din yahn Dendiohs ihyan. Che cochihve yahn ne ne, che nedin yahn Dendiohs nchuhn, ndiyu che nevahnecon ihyan iyehnse nchuhn.

3 ¹Nducote tihca ne, co vate nchuhn che rahco ne che tahque ndah ro yahn ihyan naci3n chenhahn, che co nchuhn che ndata yahn Israel nchuhn man, che chenan seña nchuhn man. ²Ate tahque ndah ro yahn nchuhn, te a tah ihyan ndico yahn ne, chihco Dendiohs Ndudo yahn ye. ³⁻⁴Andahre ama yahn ihyan chahn hua dinahn ye yahn Ndudo min, ate ndiyu cava chemin che ndaca dama Dendiohs yahn ndudo yahn ye che cah ye, te ihyan min ne, redinahn ye ndudo yahn ye, andahre nducoyaca ihyan hua redinahn ye. Tihca ye, nduhca che a ndirun nan Ndudo yahn ye tuhca:

Nducuahn che redin Dendiohs ne, ndah.

Chemin che nde hua co cahma nunde ihyan yahn ye.

⁵Co vate nchuhn che rahco ne te nan nunde yahn ne rihnde ro che ama ndah Dendiohs, ne hua redin yahn che din ye

castigo nchuhn cava nunde yahn ne. ⁶Ate hua, te Dendiohs ne, a numa ca ndah ihyan ye. Ndete che hua tihca ne, nde hua co techecade ye yahn ihyan nunde.

⁷Ndete che nan nunde yuhn vo tahque ndah cuhnde ro che ama ndah Dendiohs ne, nde hua quenán cuma che techecade ye yuhn vo. ⁸Ndete che tihca ne, tahque ndah quendi vo nunde yuhn vo, te chemin che cochihve. Vate nahñ ihyan che ndere rahn ye che tihca rahndudo nuhn. Ihyan chahn ne, redin yahn che din Dendiohs castigo ihyan.

Nducoyaca ihyan ne, chendihco ye nunde

⁹Co vate nchuhn che rahco ne che uvo, ihyan nación yahn Israel che tahque ndah ihyan uvo van nducoyaca ihyan iyehnse. Ate hua cuaco chemin, te nducoyaca ihyan nación yahn Israel man, ihyan nación chenahn man ne, quendihconahn chendihco ye nunde nduhca che a ndirun yahn ye, ¹⁰nan Ndudo yahn Dendiohs tuhca:

Metah nde ama ihyan che ndah ihyan ye.

¹¹Metah nde ama ihyan che renahn ye.

Metah nde ama ihyan che renecahco ye Dendiohs.

¹²Nducoyaca ye ne, chacondah vedame ye Dendiohs, quendi ye yune chihnga.

Metah nde ama ihyan che runecade ye.

¹³Demān ndudo chihnga mān, ndudo rihñcheh mān, ndudo rendih mān, rente ye.

¹⁴Demān che rahva ye mān, rahn tan ye mān.

¹⁵Nduco hua no rihñ deh ne, rihno ye vih.

¹⁶Nduh cuan nan che vatechica ye ne, redetohnan ye mān, rihco ye vedeyah mān.

¹⁷Nde hua renda yahn ye che ndahca cuahtenan ye nduco vih.

¹⁸Nde hua renda yahn ye che nevahnecun ye Dendiohs.

¹⁹A devano vo te nducuahn che ndirun nan ley che dirun Moisés ne, a ndirun cava che, nducoyaca ihyan che rihquentiyon ley min ihyan ne, tumacadino ye yahn nunde yahn ye, nde metah deh che cahma ye ro che techecade Dendiohs yahn ye. ²⁰Ley min ne, nducote a chihnde atenān cava che co devano ihyan che va nunde yahn ye ne, chemin che nde ama ihyan hua co cahma ye che ndah ihyan ye nan Dendiohs, andahre rahn ye che redinahn ye.

Cava che ndevahn vo ne, va che cotahno vo

²¹Ate man ne, a devano vo te ndiyu che quendi vo ley min che ndo yan Dendiohs nduco vo, nedin yahn ye uvo, te a man ye te ye, checadino vo tacā che din ye, ne chemin ne, a ndirun nan ley min man, nan ndudo che dirun ihyan profeta man.

²²Nducoyaco vo ne, cava che ndo yan Dendiohs nduco vo, nedin yahn ye uvo ne, va che cotahno vo Dihvo vo Jesucristo. Tihca, te dama no rendihche ye nducoyaco vo. ²³Nducoyaco vo ne, chendihco vo nunde, nde hua co cahmo vo che ndah ihyan uvo nan Dendiohs.

²⁴Andahre hua co cahmo vo che ndah ihyan uvo nan ye, ate numacuahn vedeyahino ndo yan ye nduco vo, nedin yahn ye uvo, dechuh ye Dihvo vo Jesucristo, ndedevahn ye uvo. Man ne, a ndo yan ye nduco vo. ²⁵Dechuh ye ihyan, chih ye, chera yun yahn ye cava nunde yuhn vo, ne che cotahno vo ihyan ne, ndaco vo vederenchahco. Che tihca

din Dendiohs ne, chihco ro ye che numa cuaco din chahtino ye yahn nunde che chahtendihco ihyan ndico nde ro menan. ²⁶Namin chihco ro ye man ro cuh, che numa cuaco rendo yan ye nduco ihyan che ritahno ye Dihvo vo Jesucristo, rene din yahn ye ihyan.

²⁷Man ne, ametah din yade nchuhn che redinahn ne yahn ley min, te atenan che cotahno ne Dihvo vo Jesucristo, ndo yan Dendiohs nduco ne, nedin yahn ye nchuhn. ²⁸Tihca, te rahn ri nchuhn te andahre hua nedinahn ihyan ley min, ate nduco che cotahno ye ihyan min ne, ndo yan Dendiohs nduco ye, nedin yahn ye ihyan.

²⁹Dendiohs ne, Dendiohs yahn nducoyaca ihyan iyehense, ihyan naci3n yahn Israel man, ihyan naci3n chenahn man, ndiyu deman yahn ihyan naci3n yahn Israel. ³⁰Tihca, te ama no Dendiohs, ne ihyan min ne, rendo yan ye nduco ihyan naci3n yahn Israel man, ihyan naci3n chenahn man, rene din yahn ye ihyan nduco che cotahno ye Dihvo vo Jesucristo.

³¹Che ritahno vo ihyan min ne, ndotenan che renda3hco ndiyo vo ley min ne, reca3h dito vo.

Nduhca che chitahno Abraham

4 ¹A devano vo nduhca che din ihyan ndico yuhn vo Abraham. ²Co rahco ihyan che nedin yahn Dendiohs

ihyan min yahn che runecade quenan ye iyehñse. Ate hua tihca, ³te nan Ndudo yahn Dendiohs ne, ndirun tuhca: “Abraham ne, chitahno ye Dendiohs, ne chemin che din yahino Dendiohs ihyan, nedin yahn ye ihyan.” ⁴Che renehidivo vo mozo yuhn vo ne, ndiyu vedevahino chemin, te quendihco vo yahn ye. ⁵Ate che rendo yan Dendiohs nduco ihyan nunde che ritahno ye Dihvo vo Jesucristo, renehin yahn ye ihyan ne, chemin che cuaco ne, vedevahino, ndiyu che quendihco ye. ⁶Atihnocano tun che dirun David yahn ihyan che redin Dendiohs vedevahino nduco ye, rendo yan ye nduco ye, renehin yahn ye ihyan. ⁷Dirun ye tuhca:

Ama ndah ro yahn ihyan che rendaca ye vederenchahco cava nunde yahn ye.

⁸Dihvo Dendiohs ne, hua redin ye castigo ihyan chahn.

⁹Cuedevano nchuhn te vedeyahino yahn Dendiohs ne, ndiyu deman cava ihyan che chenan seña ihyan, te namin cava ihyan che hua chenan seña ihyan. A rahn vo che Abraham ne, nducote chitahno ye ne, nedin yahn Dendiohs ihyan.

¹⁰Ro che nedin yahn Dendiohs ihyan ne, nde metah conan seña ihyan. ¹¹Dinoca chitahno Abraham, tuhme nedin yahn Dendiohs ihyan, chihquentiyon ye che conan seña ihyan, cava che cuhnde ro che a nedin yahn ye ihyan. Nduco tihca ne, tihyon yune Abraham nde ihyan che hua chenan seña ihyan, che cotahno ye Dendiohs, cava che ndo yan Dendiohs nduco ye, nedin yahn ye ihyan. ¹²Namin tihyon yune ye ihyan che chenan seña ihyan, che hua cochahtino ye che chenan seña ihyan, te tahque ndah ye ne, cotahno ye Dendiohs nduhca che chitahno man ye, ro che nde metah conan seña ihyan.

Rendevahn Dendiohs ihyan che ritahno ye

¹³Dendiohs ne, cah ye ndudo yahn ye Abraham che co yahn ndata yahn ye iyehñse, yahn che chitahno ye ihyan, ndiyu yahn che dinahn ye ley che dirun Moisés. ¹⁴Ndete che atenah ihyan che redinahn ye ley min che renehin yahn Dendiohs ihyan ne, tuhme nde metah deh cuande che cotahno vo ihyan, nde huane che cah ye ndudo yahn ye. ¹⁵Ate hua tihca, te ley min ne, ndotenan che cahco ro che nedin yahn Dendiohs ihyan ne, tahque ndah ne, rihco ro che din ye castigo ihyan nunde. Me ndete che metah ley min ne, nde hua tumacadino vo che va nunde yahn ihyan.

¹⁶Chemin che, che ritahno vo Dendiohs ne, numacuahn vedeyahino rene din yahn ye uvo. Andahre hua ndi cuande vo van ihyan che va tah ye ley min, hua dehve din yahn, te nduco che ritahno vo ihyan nduhca che chitahno Abraham ne, rene din yahn ye nducoyaco vo. Nduco tihca ne, riquendi vo yune yahn Abraham, ¹⁷nduhca che a ndirun nan Ndudo yahn Dendiohs tuhca: “Ama yahn ihyan quendi ye yune yehn, cotahno ye u.” Quendi vo yune yahn ye nduhca che nahn Dendiohs, ihyan min che rendedetuhche ye ihyan che a ndih ye man, rihco cade ye dehtenduh che nahn ye, ne rinahn man.

¹⁸Abraham ne, andahre ametah vede chahtino che ndaca ndata yahn ye, ate numacuahn vede chahtino chitahno ye che rahn Dendiohs nduco ye, che ama co yahn ndata yahn ye.

¹⁹Ro min ne, ametah vede chahtino yahn ye, te a ri ye tenduh ama ciento nduyo, ne ihyan ndahta yahn ye Sara ne, namin a indihche ye. Avane ne, a numaca hua renda ca daya ye. Ate nde nduco nduh ne, a chitahno ye ndudo che cah Dendiohs ihyan.

²⁰Ndotenan che o vederendedecadino yahn ye ne, chitahno ye numa ino ye ndudo che cah Dendiohs ihyan, ne ndeva ye yavenan ye. ²¹Chichahtino ye numacuahn chedave yahn ye che Dendiohs ne, va vederihquentiyon yahn ye che redinahn ye nducoahn ndudo yahn ye che recah ye. ²²Chemin che nducote tihca chitahno ye Dendiohs ne, nedin yahn Dendiohs ihyan.

²³Che nedin yahn Dendiohs ihyan min ne, a ndirun nan Ndudo yahn ye, ndiyu deman cava ihyan min, ²⁴te namin cava uvo, cava che tumacadino vo che nduco che cotahno vo Dendiohs ne, ndo yan ye nduco vo, nedin yahn ye uvo. A ihyan min che ndedetuhche ye Dihvo vo Jesucristo van tenahn. ²⁵Che chihno ihyan iyehense Dihvo vo ne, a cava nunde yuhn vo, ne che ntuche ye ne, a cava che ndo yan Dendiohs nduco vo, nedin yahn ye uvo.

Nduhca che ndo yan Dendiohs nduco vo, nedin yahn ye uvo

5 ¹Nducote tihca ne, nedin yahn Dendiohs uvo man, ndo yan ye nduco vo man, yahn che ritahno vo Dihvo vo Jesucristo. ²A cava Dihvo vo Jesucristo che din yahino Dendiohs uvo, nedin yahn ye uvo. Man ne, numacuahn vedeyeno chenan ino vo che cuahtenan vo nan ye vahchetero.

³Ndiyu deman yahn chemin che ri yeno vo, te namin ri yeno vo yahn che rechuhrihn vo. A devano vo te cuahn che rechuhrihn vo ne, rendaco vo vedechahtino man, ⁴cuahn che chenan cumo vo vedechahtino ne, riquendah ndah vo man, cuahn che riquendah ndah vo ne, chenan ino vo Dendiohs man, ⁵cuahn che chenan ino vo Dendiohs ne, hua dehve rahco vo man. Hua dehve rahco vo, te Dendiohs ne, rihco ro ye vedeyahino chahte yahn ye nduco vo, din ye che quenun Vaco Ndah yahn ye uvo.

⁶Cuahn che ametah vedechahtino che ndaca ihyan vederenchahco cava nunde yahn ye ne, ro min niyon chih Dihvo vo Jesucristo cava nducoyaca ihyan nunde, nduhca che a chihco cade Dendiohs. ⁷Hua ndere ndaca ama ihyan che cahquino ye cahco mendahn ye ihyan coh ye cava tama ca ihyan, andahre ndah ihyan ye. ⁸Ate Dendiohs che cuaco, andahre ama chendihco vo nunde, chihco ro ye che ama yahino ye uvo, dechuh ye Dihvo vo Jesucristo, chih ye cava che ndedevahn ye uvo. ⁹Man ne, nducote a nedin yahn Dendiohs uvo, yahn che a chih ihyan min, chera yun yahn ye cava nunde yuhn vo ne, a devano cuaco vo te a ndedevahn ihyan min uvo, ametah che co vo castigo ro che techecade Dendiohs yahn ihyan nunde. ¹⁰Tihca, te ro menan cuahn che ri yudo yahn Dendiohs nduco vo, cava nunde yuhn vo ne, ndo yan ye nduco vo yahn che chih Daya ye, nedihve ye nunde yuhn vo. Man che a ntuche ihyan min man, che yan Dendiohs nduco vo man ne, tahque nun ndevahn vo. ¹¹Ama yeno vo che ndo yan Dendiohs nduco vo, din Dihvo vo Jesucristo.

Ejemplo yahn Adán

¹²Cava Adán ne, chihnde nunde muhn iyehense cuh, ne cava nunde min ne, chihnde cade che coh nducoyaca ihyan, te nducoyaca ye ne, chendihco ye nunde. ¹³Nde ro che metah cuhnde ley che dirun Moisés ne, ihyan iyehense ne, a ihyan nunde ye. Ate nan che metah ley ne, nde hua duhva ra cuande nunde yahn ihyan. ¹⁴Andahre hua dama nunde yahn ihyan nduhca nunde che chahcotahn Adán yahn Dendiohs, ate quendi chih ye, canan nde ro min, nde nda ro che quenan Moisés iyehense. Cava Adán ne, nducoyaca ihyan iyehense ne, chendihco ye nunde. Ate cava Dihvo vo Jesucristo, ihyan min che nda ye iyehense adive ne, co ndevahn nducoyaca ye.

¹⁵Cava nunde yahn Adán ne, chendihco nducoyaca ihyan nunde. Ate hua tihca vedevahino yahn Dendiohs, te dechuh ye Dihvo vo Jesucristo, ne numacuahn vedeyahino, ndiyu deman ndedevahn ye ama yahn ihyan cava che hua co ye castigo, ate namin din ye che co cuahtenan ye vahchetero numacuahn ro. ¹⁶Cava nunde yahn Adán ne, va che co nducoyaca ihyan castigo. Ate hua tihca vedevahino yahn Dendiohs, te andahre ama chendihco ihyan nunde, ate ndo yan Dendiohs nduco ye, nedin yahn ye ihyan. ¹⁷Cava nunde yahn Adán ne, va che coh nducoyaca ihyan. Ate hua tihca vedevahino yahn Dendiohs, te cava Dihvo vo Jesucristo ne, nducoyaca ihyan che ndo yan Dendiohs nduco ye, nedin yahn ye ihyan ne, ama ndah ro yahn ye, cuahtenan ye vahchetero numacuahn ro.

¹⁸Tuhme nducote quendihco Adán nunde ne, va che co nducoyaca ihyan castigo. Ate nducote ndahca din Dihvo vo Jesucristo, chih ye cava ihyan nunde ne, ndo yan Dendiohs nduco ye, nedin yahn ye ihyan. ¹⁹Tihca, te yahn che chahcotahn Adán yahn Dendiohs ne, nducoyaca nducondi ihyan ne, chihndanán ihyan. Ate yahn che dinahn Dihvo vo Jesucristo yahn Dendiohs ne, ama yahn ihyan, nedin yahn Dendiohs ihyan.

²⁰Ley che dirun Moisés ne, chihnde cava che tahque cuhnde ro nunde yahn ihyan che co ro menan, ne ama chihnde ro che chendihco ye nunde. Ate nde nduco nduh ne, tahque quenán cuma Dendiohs vedeyahino, ²¹ne andahre redin nunde yahn ihyan che co ye castigo, ate numacuahn vedeyahino ndo yan Dendiohs nduco ihyan che ritahno ye Dihvo vo Jesucristo, nedin yahn ye ihyan, cuahtenan ye vahchetero numacuahn ro.

***Ihyan che ritahno ye Dihvo vo Jesucristo ne,
ametah che cuahtendihco ye nunde***

6 ¹Nducote tihca ne, nde hua ndedecadino vo che quendi vo cuahtendihco vo nunde cava che tahque cuhnde ro vedeyahino yahn Dendiohs nduco vo. ²Ndiyu tihca che va che din vo, te a chihcoman vo nunde yuhn vo, ne hua ndahca che quendi vo. ³Cuedevano nchuhn te che chedenune vo, cah vo Dihvo vo Jesucristo ne, nguahco yuhn vo che chih ye, chi cuande vo van ihyan yahn ye. ⁴Tihca, cava che nduhca che numacuahn vederihquentiyon ndedetuhche Dendiohs Chida

ihyan min v̄an ten̄ahn ne, namin uvo che a ndi i vo, nedin nunde yuhn vo ne, din ye che ndo vo ihyan ra, cuahtechico vo runec̄ade.

⁵Tihc̄a, te nducote nguahco yuhn vo che chih Dihvo vo, chi cuande vo v̄an ihyan yahn ye ne, namin din Dendiohs che ndo vo ihyan ra, cuahtechico vo runec̄ade nduhc̄a che ndedetuhche ye ihyan min v̄an ten̄ahn. ⁶Din vo cuande che anduhneç̄a ndete che a chenān yah vo nduco Dihvo vo, çava che çahcomān vo nducuahn nunde che chahtendihco vo ro menān, ne hua quendi vo cuahtendihco vo. ⁷Nduco tihc̄a ne, anduhneç̄a ndete che a chih vo, ne āma yune no chihcomān vo nunde yuhn vo. ⁸Me nducote anduhneç̄a ndete che a chih vo d̄ama nduco Dihvo vo Jesucristo ne, a chenān ino vo che conduco vo ihyan, ⁹te a devano vo che a ndedetuhche Dendiohs ihyan v̄an ten̄ahn, ametah ndaconan coh ye. Çava ye ne, ametah vederih. ¹⁰Me yahn che chih ye ne, āma yune no chih ye çava nunde yuhn vo. Ate ntuche ye, ne conāhn ye vahchetero. Mān ne, va ye nān Dendiohs. ¹¹Nduco tihc̄a ne, din vo cuande, ne çahcomān vo nunde yuhn vo, runec̄ade cuahtechico vo nduhc̄a che nahn Dendiohs, cochahtino vo Dihvo vo Jesucristo.

¹²Chemin che hua quendi vo cuahtechico vo vedeyeno yahn mān vo, cuahtendihco vo nunde. ¹³Hua çahco vo chedave yuhn vo, cuahtendihco vo nunde, te tahque ndah ne, nduhc̄a ihyan ra ne, va che çahco vo chedave yuhn vo t̄ah Dendiohs çava che runec̄ade cuahtechico vo nduhc̄a che nahn ye. ¹⁴A ndevahn vo, ametah che cuahtendihco vo nunde, te ndotenan che çahcantiyon ley che dirun Moisés uvo ne, a rihquentiyon Dendiohs uvo, redin yahino ye uvo.

¹⁵Co vate ihyan che rahco ye che nducote yahino Dendiohs uvo mān, hua rihquentiyon ley che dirun Moisés uvo mān ne, a vateman vo, co cuahtendihco vo nunde. Ate hua tihc̄a. ¹⁶A devano vo te ndete che cuanān din vo ntiyon nduco āma patrōn ne, va che dinahn vo che çahcantiyon ye. A namin no tun ndete che çahco vo chedave yuhn vo t̄ah Dendiohs ne, va che runec̄ade cuahtechico vo nduhc̄a che nahn ye. Me ndete che çahco vo chedave yuhn vo che quendi vo yune yahn mān vo ne, va che co vo castigo. ¹⁷Nundihve cuahn Dendiohs, te nchuhn ne, andahre chahtechica ne vedeyeno yahn mān ne

ro menan, chahtendihco ne nunde, ametah tama nan che co din ne ne, ate chitahno ne ndudo ndah yahn Dihvo vo Jesucristo, chihco ne chedave yahn ne tah ye. ¹⁸A ndevahn ne, a chihcoman ne yune chihnga yahn ne, cava che runecade cuahtechica ne. ¹⁹Dirun ejemplo chemin chan cava che co conahn ne. Ro menan me ne, chihco ne chedave yahn ne che quendi ne yune chihnga, ne ca cuahn ca cuahn nde tahque chihnga redin ne. Ate man ne, nahn che cahco ne chedave yahn ne tah Dendiohs, cava che tahque runecade cuahtechica ne ro ro.

²⁰Ro menan cuahn che quendi ne yune chihnga, chahtendihco ne nunde ne, va man ino ne, nde hua renda yahn ne che runecade cuahtechica ne. ²¹Nducuahñ dehtenduh che chihnga din ne ro min ne, hua chichihve yahn ne, nde ri cuihnan ne yahn. Avane ne, a vate ne che co ne castigo. ²²Ate man che ndedevahn Dendiohs nchuhn, nchahco ye nunde yahn ne ne, chihco ne chedave yahn ne tah ye. Ama cochihve yahn ne, te runecade cuahtechica ne, ne cuihno min ne, cuahtenan ne vahchetero numacuahn ro. ²³Ihyan che rahtendihco ye nunde ne, va che co ye castigo, din nunde yahn ye. Ate ihyan che ndichahtino ye Dihvo vo Jesucristo ne, numacuahn vedevahino, ndeva Dendiohs ihyan, cuahtenan ye vahchetero numacuahn ro.

Nduhca che rihquentiyon ley che dirun Moisés

7 ¹Dihnó, nducote a devano nchuhn ley che dirun Moisés ne, a tumacadino ne te rihquentiyon ihyan atenan ro che vate ye iyehñse. ²Condiheche ne. Ama ndahta ne, rihquentiyon ley min che hua co tehche te inchahn te, cahnevaco te nduco tama chahn. Ate ndete che coh inchahn te ne, nuhndeman te yahn vederihquentiyon min. ³Chemin che ndete che cuhnde te nduco tama chahn numanahn che va inchahn te ne, din duche yahn te che a nihnevaco te, condihco te nunde. Ate ndete che coh inchahn te ne, nuhndeman te yahn vederihquentiyon min, ne co ndaconan cahnevaco te, ametah condihco te nunde.

⁴Dihnó, nduhca ndahta che a ndih inchahn te ne, tihchan vo nan ley che dirun Moisés, te nducote a chitahno vo Dihvo vo Jesucristo, ihyan min che chih ye ndedevahn ye uvo ne, a chihno vederihquentiyon yahn ley min cavo vo. Man

ne, a ndedetuhche Dendiohs ihyan v̄an ten̄ahn, ne a ihyan min che rihquentiyon ye uvo, nahn ye che cochihvo vo n̄an ntiyon yahn Dendiohs. ⁵Ro men̄an cuahn che chahtechico vo vedeyeno yahn m̄an vo ne, andahre chihco ro ley min che chendihco vo nunde, ne va che co vo castigo, ate quendi vo chahtendihco vo nunde. ⁶Ate ley ndico me ne, chihno vederihquentiyon yahn çavo vo. M̄an ne, redin vo ntiyon yahn Dendiohs numacuahn vederihquentiyon yahn Vaco Ndah yahn ye.

Rahn Pablo yahn nunde yahn ye

⁷Andahre tihçā, ate hua co çahmo vo che çava ley min che rahtendihco vo nunde. U ne, ndete che hua çava ley min ne, nde hua chidevanó cha che nunde. Nduhçā vede idihya ne, a che a ndirun yahn n̄an ley min che chidevanó che nunde chemin. ⁸A çava ley min che tumacadinó che ama quendihcó nunde yahn vede idihya, ate quendí nduco vede idihya. Ndete hua çava ley min ne, nde hua tumacadino vo che va nunde yuhn vo. ⁹Ro men̄an cuahn che nde hua devanó ley min ne, va m̄an inó. Ate cuahn che chidevanó ley min ne, tumacadinó che quendihcó nunde, ne ama chi ndaché çava. ¹⁰Ley min ne, a chihnde çava che tihyon yune ihyan che runecāde cuahtechica ye, ne quenan inó che ndahçā conán. Ate ndotenan che tihçā ne, chihco ro che ama va nunde yáhn, ne ama chi ndaché. ¹¹Quenan inó che ndahçā conán, ate chihncheh m̄an u, te hua chichá dináhn nduhçā che rihquentiyon ley min. Ama chi ndaché, te cuahn d̄ama redín dehtenduh che rihco yudo ley min yahn.

¹²Chemin che a devano vo te ley min ne, ndah. ¹³Din che chi ndaché, ate hua co çahma nundé yahn, te ley min ne, ndah, ne aten̄an che din ne, che chihco ro che chihnga dehtenduh che dín. Andahre tihçā, ate chahcotáhn che rihquentiyon, ne a nunde yahn m̄an din che ama chi ndaché.

¹⁴A devano vo te ley min ne, a Dendiohs che chihco ye, ate u ne, ihyan nunde u, a ndihcó chedave yáhn che condihcó nunde. ¹⁵Nde m̄an hua retumacadinó nduhçā che redín, te ndotenan che dín dehtenduh che ndah che renan inó ne, redín dehtenduh che hua ndah che hua renan inó. ¹⁶Nducote redín dehtenduh che chihnga, che nde m̄an hua renan inó ne,

retumacadinó te ley min ne, ndah, yahn che rihco yudo yahn dehtenduh che chihnga. ¹⁷Andahre hua nahn dín dehtenduh chemin chan, ate hua richá, ne redín, rendihcó nunde.

¹⁸Tihcá, te vedeyeno yahn mán ne, hua ndahcá. Nahn dín dehtenduh che ndah, ate hua richá che dín. ¹⁹Ndotenan che dín dehtenduh che ndah che renan inó ne, redín dehtenduh che chihnga che hua renan inó. ²⁰Nducote redín deman dehtenduh che hua renan inó, rendihcó nunde ne, a ndero ndi che hua ndahcá vedeyeno yáhn.

²¹Tihcá rahno rí. Cuahn che ndedecadinó che nahn dín che ndah ne, tahque nun renda yáhn che dín dehtenduh che chihnga. ²²Andahre nahn dináhn vederihquentiyon yahn Dendiohs, ²³ate hua richa yáhn, te tahque nun renda yáhn che riquendí vedeyeno yahn mán, rendihcó nunde.

²⁴¡Ama vedín! ¿A va ihyan che co ndedevahn ye u yahn che ama quendihcó nunde ne? ²⁵Atenan Dendiohs, te dechuh ye Dihvo vo Jesucristo, ndedevahn ye u. ¡Nundihve cuahn ihyan! Nduhcá che a ráhn ne, nahn dináhn vederihquentiyon yahn Dendiohs, ate hua richa yáhn, te tahque nun renda yáhn che riquendí vedeyeno yahn mán, rendihcó nunde.

Nduhcá che rahtechica ihyan che ritahno ye Dihvo vo Jesucristo

8 ¹Nducote a chih Dihvo vo Jesucristo cava nunde yahn ihyan iyehense ne, nducoyaca ihyan che ritahno ye ihyan, chihcoman ye che rahtendihco ye nunde, redinahn ye vederihquentiyon yahn Vaco Ndah yahn Dendiohs ne, ihyan chahn ne, a nchahco Dendiohs nunde yahn ye, ametah co ye castigo. ²Tihcá, te uvo che ritahno vo Dihvo vo ne, rihquentiyon Vaco Ndah yahn Dendiohs uvo, redin che rendo vo ihyan ra, ne ametah rahtendihco vo nunde man, ndevahn vo yahn castigo che va che co ihyan nunde man. ³Nducote ama nahn cuahtechico vo vedeyeno yahn man vo ne, hua chicha vo dinahn vo ley che dirun Moisés. Ate Dendiohs ne, ndedevahn ye uvo, dechuh ye Daya ye, ndo ye nduhcá ama ihyan iyehense. Ihyan min ne, andahre hua quendihcó ye nunde, ate chih ye, nedihve ye nunde yuhn vo. ⁴Tihcá din ye cava che, uvo che a chihcoman vo vedeyeno yahn man vo, runecade vatechico vo nduhcá che nahn Vaco Ndah yahn Dendiohs ne, co dinahn vo che rihquentiyon ley min.

⁵Ihyan che vatechica ye vedeyeno yahn mān ye, rahtendihco ye nunde ne, rendedecadino ye dehtenduh che chihnga. Me ihyan che vatechica ye nduhcā che nahn Vaco Ndah yahn Dendiohs ne, rendedecadino ye yahn vederihquentiyon yahn. ⁶Ihyan che redinahn ye vederihquentiyon yahn Vaco Ndah yahn Dendiohs ne, rendo ye ihyan ra, ne ndahca rahtechica ye. Ate ihyan che vatechica ye vedeyeno yahn mān ye, rahtendihco ye nunde ne, quenan cuma che din Dendiohs castigo ihyan. ⁷Ihyan che vatechica ye vedeyeno yahn mān ye, rahtendihco ye nunde ne, rahcotahn ye yahn vederihquentiyon yahn Dendiohs, nde hua ri che dinahn ye. ⁸Che tihcā redin ihyan chahn ne, hua recāh yune ye che ndo yan Dendiohs nduco ye.

⁹Ate nchuhn ne, ndete che cuāco che quenun Vaco Ndah yahn Dendiohs nchuhn ne, hua vatechica ne vedeyeno yahn mān ne, te redinahn ne che rihquentiyon. Me duh che metah nedin yahn Dihvo vo Jesucristo ne, hua quenun Vaco ye. ¹⁰Ndete che quenun Vaco ye nchuhn ne, andahre ama chendihco ne nunde, ate ndo yan ye nduco ne, nedin yahn ye nchuhn. ¹¹Ndete che Vaco Ndah yahn Dendiohs, ihyan min che ndedetuhche ye Dihvo vo Jesucristo van tenahn, quenun nchuhn ne, numacuahn vederihquentiyon min ndedetuhche ye nchuhn ndā ro yahn.

¹²Dihnó, chemin che quenan cumo vo che cahcomān vo vedeyeno yahn mān vo, ¹³te ndete che cuahtechico vo vedeyeno yahn mān vo, cuahtendihco vo nunde ne, va che co vo castigo. Ate ndete che cohahtino vo Vaco Ndah yahn Dendiohs, din che cahcomān vo vedeyeno yahn mān vo ne, tuhme runecāde cuahtechico vo.

¹⁴Nducoyaco vo che rihquentiyon Vaco Ndah yahn Dendiohs uvo ne, a yahn ye uvo. ¹⁵Che quenun Vaco Ndah yahn ye uvo ne, ndiyu cava che din vah vo ihyan nduhcā che din vo ro menān, te cava che nedin daya ye uvo. Che rahn vo yahn Dendiohs: “Ndih, Chida nuhn” ne, ¹⁶a mān Vaco ye rete che recadino vo che daya ye uvo. ¹⁷Me nducote a daya ye uvo ne, ndeva ye uvo, cuahtenan vo dama nduco Dihvo vo Jesucristo vahchetero. Ndete che rechuhrihn vo mān ro cuh nduhcā che chuhrihn Dihvo vo ne, quenan cuma che cuahtenan vo dama nduco ye vahchetero.

¹⁸A devano vo te che rechuhrihn vo man ro cuh ne, tah ra chemin, te ama ndahca cuahno vo cuahn che ndeva Dendiohs uvo, cuahtenan vo vahchetero. ¹⁹Man ro cuh ne, nducuahn che va iyehanse ne, ama ndache chenani, ate nda ro che ndeva Dendiohs ihyan yahn ye ne, nde nducuahn dehtenduh chemin chan ne, ama ndahca cuahno. ²⁰Tihca, te nducuahn dehtenduh ne, a din dine Dendiohs, andahre metah nunde yahn. Ate nda ro yahn ne, ²¹ndahco cade ye nducuahn, ne ama ndahca cuahno nduhca che cuahno ihyan yahn ye, te man ye cahcantiyon ye nducuahn. ²²A devano vo te nde meniyan ne, nducuahn che va iyehanse ne, ama ndache chenani. ²³Namin uvo che quenun Vaco Ndah yahn Dendiohs uvo ne, ama ri ndache ino vo, chenani rino vo che ndedetuhche Dendiohs uvo, ndeva ye uvo. ²⁴A ndedevahn Dendiohs uvo, ne chenani ino vo che ndeva ye uvo. Dehtenduh che a chinahn ne, ametah chenani ino vo che coman va che conahn, te a chinahn. Tihca, te nde ama ihyan ne, hua quenani ino ye che coman va che conahn dehtenduh che a chinahn. ²⁵Uvo ne, numacuahn vedechahtino chenani ino vo dehtenduh che coman va che conahn.

²⁶Namin Vaco Ndah yahn Dendiohs ne, rinani uvo van dehtenduh che rechuhrihn vo. Andahre hua devano covah vo nduhca che redin yahn, ate rinani Vaco Ndah yahn Dendiohs uvo, rahn nan uvo numa dito, nde hua tuno vederendedecadino yuhn vo deh cahmo vo yahn. ²⁷Dendiohs, ihyan min che devano ye deh che rendedecadino vo ne, renahn ye deh che rica Vaco Ndah yahn ye, te rahn nan ihyan yahn ye nduhca che nahn man ye.

***Ihyan yahn Dendiohs ne, ametah deh
cuande che dihya nun ino ye co***

²⁸A devano vo te uvo che yahino vo Dendiohs, che man ye tendahnun ye uvo ne, nducuahn che rahno ri vo ne, a cava che ndah yuhn vo. ²⁹Tihca, te a tendahnun Dendiohs uvo, ne chihco cade ye nde ro menan che cotahno vo ihyan, cava che ama yahn vo co vo nduhca Daya ye, ihyan min che conan ye yuhn vo. ³⁰Uvo che a tendahnun Dendiohs uvo ne, din ye che chitahno vo. Ndo yan ye nduco vo, nedin yahn ye uvo, ne quenani cuma che ndeva ye uvo vahchetero.

³¹A devano cuꞩaco vo te nducote a maꞩ Dendiohs yahino ye uvo ne, ametah duh che co cahnevi uvo taꞩ ye. ³²Ihyan min ne, andahre ama yahino ye Daya ye, ate chihco mendaꞩn ye ihyan, chih ye caꞩa nducoyaꞩo vo. Nducote tihcꞩa din ye caꞩo vo ne, nde tahque nun din ye dehtenduh chenaꞩn caꞩo vo. ³³Uvo che a tendahnun Dendiohs uvo ne, nde hua cochihve yahn ihyan che cuih nunde ye yuhn vo, te a maꞩ Dendiohs nedin yahn ye uvo. ³⁴Hua cochihve yahn ihyan che cuih nunde ye yuhn vo, te Dihvo vo Jesucristo, ihyan min che chih ye, ne ntuche ye vaꞩ tenaꞩn ne, va ye laꞩo taꞩ cuꞩaco Dendiohs, ne a ihyan min che raꞩn nan ye uvo. ³⁵Ametah deh che co din che to ino Dihvo vo Jesucristo nduco vo. Andahre chuhrihn vo maꞩ, andahre din taꞩ ihyan nduco vo maꞩ, andahre nde metah che chuh vo maꞩ, andahre nde metah tino yuhn vo maꞩ, andahre caꞩnda yuhn vo che vato vo taꞩ vederih maꞩ, andahre caꞩno ihyan uvo maꞩ, ate Dihvo vo Jesucristo ne, yahino ye uvo. ³⁶Tihcꞩa rahno ri vo, nduhcꞩa che a ndirun naꞩ Ndudo yahn Dendiohs tuhcꞩa:

Dihve nuhn, yahn che ritahno nuhn ndih, rihno ihyan combiero yahn nuhn cuahn daꞩa.

Rihno ye nuhn nduhcꞩa che rihno ye itecuche che va che caꞩno ye ite.

³⁷Ate nde nduco nduh ne, hua dehva co yuhn vo, te Dihvo vo Jesucristo, ihyan min che yahino ye uvo ne, redin ye cudado uvo. ³⁸Chemin che a devano cuꞩaco vo te nde huane vederih, nde huane vedevihche, nde huane ángel, nde huane vaco chihnga, nde huane dehtenduh che ri, nde huane dehtenduh che va che co, ³⁹nde huane naꞩ yaꞩo, nde huane naꞩ yaꞩo, nde ama naꞩ dehtenduh chemin chan, hua co din che to ino Dendiohs nduco vo, te ihyan min ne, yahino ye uvo che cuande yahn Dihvo vo Jesucristo.

A tendahnun Dendiohs ihyan nación yahn Israel

9 ¹Nduhcꞩa che ritahnó Dihvo vo Jesucristo maꞩ, numacuahn vederihquentiyon yahn Vaco Ndah yahn Dendiohs maꞩ ne, cuꞩaco raꞩn rí nchuhn ²⁻³te ama yah rí caꞩa ihyan nación yaꞩn maꞩ, ama rendedecadinó caꞩa ye maꞩ, nde tuno náhn che co dine maꞩ naꞩ Dihvo vo Jesucristo, ndete che nduco chemin co ndevahn ihyan chahn. ⁴Ihyan chahn

ne, ndata yahn Israel ihyan, a nedin daya Dendiohs ihyan, ne numacuahn vederihquentiyon chinduco ye ihyan man, cah ye ndudo yahn ye ihyan man, chihco ye ley yahn ye tah ye man, chicuahn ye ihyan taca ndeva ye yavenan ye man. ⁵Ihyan chahn ne, ndata yahn ihyan ndico ihyan. A nan ndata yahn ye quendah Dihvo vo Jesucristo, ihyan min che Dendiohs ye. ¡Ama chahte vederihquentiyon yahn ye, ndeva vo yavenan ye cuahn dama!

⁶Che chi dine ama yahn ihyan chahn ne, hua co din vo nunde yahn Dendiohs, te ndudo yahn ye ne, rinahn. Che cuaco ne, andahre nducoyaca ye ndata yahn Israel ihyan, ate hua nducoyaca ye chitahno ye. ⁷Andahre ndata yahn Abraham ihyan, ate hua nducoyaca ye chitahno ye nduhca che chitahno ihyan min. Nan Ndudo yahn Dendiohs a ndirun tuhca: “Atenan van daye Isaac din cuandé ndata yehn.”

⁸Nduco tihca ne, tumacadino vo che hua nducoyaca ihyan che ndata yahn Abraham nedin yahn Dendiohs ihyan, te atenan ihyan che a necah ye ndudo yahn ye che nedin yahn ye ihyan.

⁹Ndudo yahn Dendiohs che cah ye Abraham ne, tuhca: “Nda ro yahn ne, din vederihno, ne Sara ne, ndaca ama daya te.”

¹⁰A namin no tun nduh che o sahn daya ihyan ndico yuhn vo Isaac, nduco ndahca yahn ye Rebeca. ¹¹Sahn chahn ne, andahre nde metah cuahteyan se, andahre nde metah din se che ndah, nde huane che chihnga, ate Dendiohs ne, tendahnun ye ama cha sahn chahn, chihco ro ye che retendahnun ye ihyan che ri yeno man ye, atanochan ye.

¹²Rahn ye ri ye chaco se: “Sahn che ive me ne, conan se yahn dihno se che menan.” ¹³Tihca chinahn nduhca che a ndirun nan Ndudo yahn Dendiohs tuhca: “Tahque din yahinó Jacobo che co Esau.”

¹⁴Nde hua co cahma vo che hua ndahca che tihca redin Dendiohs, ¹⁵te a ndirun nan Ndudo yahn ye che rahn ye nduco Moisés tuhca: “Conan vahinó adecoduhno ihyan che ri yeno man.” ¹⁶Nducote tihca ne, ihyan che ndevahn ye ne, ndiyu yahn ntiyon che redin ye, nde huane yahn che redin nun ino ye, te atenan che conan vahino Dendiohs ihyan.

¹⁷Namin a ndirun nan Ndudo yahn Dendiohs nduhca che rahn ye nduco rey yahn Egipto tuhca: “A u che te yuné che quenen rey, ne redin vederihno nan, rihco ró che ama quenan

cumá vederihquentiyon, cadino ihyan numachahte iyehñse.”

¹⁸Nduco tihcá ne, a ndero ndi che duh che nahn conan vahino Dendiohs ne, renan vahino ye, ne duh che nahn din cheche ye chedave yahn ne, redin ye.

¹⁹Co vate ihyan che rāhco ye che nducote tihcá ne, hua ndahcá che din Dendiohs castigo ihyan nunde, te mān ye redin cheche ye chedave yahn ihyan chahn. ²⁰Ate nde ama ihyan hua co cahma nunde ye yahn Dendiohs. A Dendiohs che dendah ye ihyan iyehñse, ne nde ama ihyan hua co cahma nunde ye yahn ihyan min yahn dehtenduh che redin ye. ²¹Ihyan che redendah ye chite yahn ne, co dendah ye che ndahchan mān, co dendah ye che ndere mān, atanocá che ri yeno mān ye.

²²Atihnocá Dendiohs. Co din ye adecodehno che ri yeno mān ye, ne nde ama ihyan hua co cahma nunde ye yahn ye. Cuahn che nahn ye ne, co din ye castigo ihyan nunde, cahco ro ye vederihquentiyon yahn ye. Andahre quenán cuma che din ye castigo ihyan chahn, ate redin chahtino ye yahn ye. ²³Namin numacuahn vederihquentiyon yahn ye rihco ro ye che ama chahte vedevahino yahn ye nduco ihyan che a tendahnun ye nde ro menān. Ihyan chahn ne, ndeva ye ihyan vahchetero. ²⁴Uvo van ihyan nación yahn Israel mān, van ihyan nación chenahn mān ne, a tendahnun ye uvo, ²⁵nduhcá che dirun ihyan profeta Oseas tuhca:

Rāhn Dendiohs: “Ihyan che hua ihyan yáhn ne, nedin yáhn ihyan.

Ihyan che hua din yahinó ne, din yahinó ihyan.”

²⁶Namin rāhn ye: “Ihyan nación chenahn che ndiyu ihyan yáhn ne, nedin dayá ihyan, cahma nducoyaca ihyan che ihyan chahn ne, daya Dendiohs ihyan.”

²⁷Me ihyan nación yahn Israel ne, rāhn Dendiohs yahn ye, dirun ihyan profeta Isaías tuhca: “Andahre ama yahn ihyan nación yahn Israel nduhcá che ndeh yahndute che chetave cuahn chito nuniyahn ne, neve ra ye che ndevahn ye, ²⁸te Dihvo vo Dendiohs ne, nduco nun no din ye castigo ihyan.”

²⁹Namin dirun ihyan profeta Isaías tuhca:

Ndete che Dihvo vo Dendiohs, ihyan min che va ye vahchetero, hua ndedevahn ye neve ihyan nación yuhn vo ne,

ametaḥ nde ama vo; a chihno chih vo, nduhc̄a che chihno
 chih ihyan yan Sodoma man, ihyan yan Gomorra man.

³⁰Nducote tihc̄a ne, a tumacadino vo che ihyan nación
 chenahn che nde hua yahn Dendiohs ihyan ne, nducote a
 chitahno ye ne, nedin yahn Dendiohs ihyan. ³¹Me ihyan
 nación yahn Israel ne, renevahnecun ye ley che dirun Moisés,
 chenán ino ye che ndevahn ye, ate nducote hua dinahn ye
 ne, hua nedin yahn Dendiohs ihyan. ³²Hua nedin yahn ye
 ihyan, te ndotenan che cotahno ye ne, tahque ndah ye ne,
 ndedecadino ye che dinahn ye ley min, ndevahn ye. Ate hua
 ndevahn ye, te va deh cuande che denda ye, ³³nduhc̄a che a
 ndirun nan Ndudo yahn Dendiohs tuhc̄a:

Cuihcovan nchuhn. Dechúh ama ihyan nación yahn ne.
 Ihyan min ne, nduhc̄a ama tu che conda c̄ah ihyan.
 Ihyan che hua cotahno ye ihyan min ne, conda ye.
 Ate ihyan che cotahno ye ihyan ne, ndevahn ye.

10 ¹Dihnó, numacuahn chedave yáhn ricá Dendiohs
 che ndedevahn ye ihyan nación yahn Israel. ²U
 ne, ráhn te ihyan chahn ne, rahco ye te ama redinahn
 ye che rihquenityon Dendiohs, ate nde hua renahn ye
 vederihquentyon yahn ye. ³Tihc̄a, te nducote nde hua
 devano ye vederihquentyon yahn Dendiohs che ndo yan ye
 nduco ihyan, nedin yahn ye ihyan ne, rahcotahn ye yahn
 vederihquentyon min, riquendi ye vededevano yahn man
 ye. ⁴Dendiohs ne, rene dinahn ye nducoyaca ihyan che
 ritahno ye Dihvo vo Jesucristo. A cava ihyan min che chihno
 vederihquentyon yahn ley che dirun Moisés.

⁵Moisés ne, dirun ye te ihyan che dinahn ye che
 rihquentyon ley min ne, nedin yahn Dendiohs ihyan. ⁶Me
 che nedin yahn Dendiohs ihyan che ritahno ye ne, co vate
 ihyan che duche rino ye, ne tuhc̄a ráhn ye: “¿Duhra chahn
 vahchetero, ndihchero che min chica ihyan min che a va c̄ade
 che chi ye ndedevahn ye ihyan iyehñse? ⁷¿Duhra chahn van
 tenahn, ndihchero che ntuche ihyan min?” Ama vedetundo
 che tihc̄a ráhn ihyan, ⁸te nan Ndudo yahn Dendiohs ne, a
 ndirun tuhc̄a: “Ndudo cuaco ne, a va tah nchuhn.” Ndudo min
 ne, a ndudo ndah yahn Dihvo vo Jesucristo che rahndudo
 nuhn. ⁹Cava che ndevahn nchuhn ne, nahn che cotahno ne
 numacuahn chedave yahn ne, che Dihvo vo Jesucristo ne,

ndedetuhche Dendiohs ihyan v̄an ten̄ahn, ne çahma ne che a ihyan min che Dihve ne, renevahnecun ne ihyan. ¹⁰Tihçā, te ihyan che numacuahn chedave yahn ye ritahno ye Dihvo vo Jesucristo, ne r̄ahn ye che ihyan min che renevahnecun ye ne, ndevahn ye, ne rendo ȳan Dendiohs nduco ye, renedin yahn ye ihyan.

¹¹N̄an Ndudo yahn Dendiohs ne, a ndirun tuhçā:

“Adecoduhno ihyan che ritahno ye ihyan min ne, hua conda ye.” ¹²Tihçā, te nducoyāca ihyan, ihyan nación yahn Israel m̄an, ihyan nación chen̄ahn m̄an, a ihyan min che Dihve ye, ne yahino ye nducoyāca ihyan che ritahno ye ihyan, rendeva ye yaven̄an ye. ¹³Namin a ndirun tuhçā: “Nducoyāca ihyan che cuah ye Dihvo vo ne, ndevahn ye.” ¹⁴Ate ndete che hua ritahno ye Dihvo vo ne, nde hua cuah ye ihyan. Ndete che hua nihnevan ye ndudo yahn ye ne, nde hua cotahno ye ihyan. Ndete che metah duh che cuahndudo ne, nde hua cahnevan ye ndudo yahn ye. ¹⁵Ndete che hua dechuh Dendiohs ihyan che cuahndudo ye ne, nde metah duh che cuahndudo. A ndirun n̄an Ndudo yahn Dendiohs tuhçā: “¡Ama ndah ro yuhn vo!, che rendā ihyan rahndudo ye ndudo ndah yahn Dendiohs, din che ndāhçā cuahtenan vo.”

¹⁶Ate hua nducoyāca ihyan redinahn ye yahn ndudo min nduhçā che dirun ihyan profeta Isaías tuhçā: “Dihvé, neve ra ihyan che ritahno ye ndudo yahn ne che rahndudo nuhn.”

¹⁷Çava che cotahno ihyan Dihvo vo Jesucristo ne, va che cahnevan ye ndudo yahn ye.

¹⁸Nde hua co çahma ihyan che hua chihnevan ye ndudo min, te n̄an Ndudo yahn Dendiohs a ndirun tuhçā:

Ndudo yahn ye ne, a chetuhn numachahte iyehñse.

A chihnevan nducoyāca ihyan.

¹⁹Me ihyan nación yahn Israel ne, a chenahn ye ndudo min, te Moisés men̄an vihca dirun ye tuhçā:

R̄ahn Dendiohs: “U ne, nedin yáhn ihyan nación chen̄ahn che r̄ahco nchuhn che ndere ihyan ye, dín che co ve ne m̄an, co t̄an ne m̄an.”

²⁰Nde tahque numa dirun ihyan profeta Isaías tuhçā:

R̄ahn Dendiohs: “Ihyan nación chen̄ahn che nde hua tumaçah ye u ro men̄an ne,

çahco ró vederihquentiyon yáhn v̄an ye, ne cotahno ye u.”

²¹Me yahn ihyan nación yahn Israel ne, dirun ye ndudo che rahñ Dendiohs yahn ye tuhçá: “Cuahn ðama riyahvé nchuhn, ate rahcotahn ne yáhn.”

Ihyan nación yahn Israel che ndevahn ye

11 ¹Co vate ihyan che rahco ye, che a ama yune no chacondah vedame Dendiohs ihyan yahn ye, ihyan nación yahn Israel. Ate hua tihçá. A devano cuacó, te u ne, ihyan nación yahn Israel u. Abraham man, Benjamín man, che ihyan ndico yáhn. ²Dendiohs ne, hua chacondah vedame ye ihyan che a tendahnun ye nde a rahñ me. A devano nchuhn nduhçá che covah ihyan profeta Elías, ndirun yahn nan Ndudo yahn Dendiohs. Çahn nunde ye yahn ihyan nación yahn Israel tuhçá: ³“Dihvé, ihyan sih ne, a chihno chihno ye ihyan profeta yahn ne, a chihno ndahtera ye nducuahn nan ta yahn ne. A deman u che ametah çahn ye, ne rinuhn ye u che çahn ye u.” ⁴Ate a devano ne nduhçá che ndaconan Dendiohs yahn ye. Rahñ ye: “Vate ca te ndache mil ihyan yáhn che metah ndeva ye yavenan Baal che redin ihyan sih dendiohs yahn ye.” ⁵Atihnoca man ro cuh, te yahn ihyan nación yahn Israel che tendahnun Dendiohs ihyan numacuahn vedeyahino yahn ye. ⁶Nducote yahn che yahino ye ihyan chahn che tendahnun ye ihyan ne, a ndero ndi che ndiyu çava che dinahn ihyan chahn ley che dirun Moisés. Ndete che yahn che dinahn ye ley min che tendahnun Dendiohs ihyan ne, tuhme nde hua rendotenan ye vedeyahino yahn Dendiohs çava che ndevahn ye.

⁷Hua nducoyaca ihyan nación yahn Israel chi ndevahn ye nduhçá che ndedecadino ye. Atenan ihyan che tendahnun Dendiohs che ndevahn ye. Me ihyan chenahn ne, din cheche Dendiohs chedave yahn ye, ⁸nduhçá che a ndirun nan Ndudo yahn ye tuhçá:

Din Dendiohs che anduhneca che a ndih chedave yahn ye.

Nde meniyon ne, rendihchero no ye, ate hua renchanan ye, rihnevan no ye, ate hua renahn ye.

⁹Namin dirun David tuhçá:

Dihvé, codin ne che dehtenduh vihco che redin ihyan sih din che denda ye.

¹⁰Cuacondah vedame ne ihyan cuahn ðama, codin ne castigo ihyan.

¹¹Co rahco ihyan che din cheche Dendiohs chedave yahn ihyan nación yahn Israel cava che ama yune no conda ye. Ate hua tihca, te che chahcotahn ihyan chahn yahn Dendiohs, chahtendihco ye nunde ne, ndaca yune che ndevahn ihyan nación chenahn. Ndi chero ye che rendevahn ihyan nación chenahn ne, din nun ino ye, ndonun yune ye nevah necun ye vederihquentiyon yahn Dendiohs. ¹²Nducote cava nunde yahn ihyan nación yahn Israel ama ndahca chahno ihyan nación chenahn, ndevahn ye ne, nde tahque ndahca yahn ye cuahn che ndeva Dendiohs nducoyaca ihyan nación yahn Israel.

¹³Nchuhn ihyan nación chenahn, u ne, a tendahnun Dendiohs u che co apóstol, cuahndudó ndudo yahn ye van nchuhn. Redín ntiyon yahn ye numacuahn chedave yahn, ¹⁴te nahn che ndi chero ihyan nación yahn nduhca che rendedevahn Dendiohs nchuhn. A huane din nun ino neve ye, codama ye nduco ne, cotahno ye Dihvo vo Jesucristo, ndevahn ye. ¹⁵A cava che chacondah vedame Dendiohs ihyan nación yahn Israel che ndahca chahno ihyan nación chenahn, ndo yan Dendiohs nduco ye. Che ndeva ye nducoyaca ihyan nación yahn Israel ne, nde tahque ndahca yahn ihyan nación chenahn, anduhneca ndete che a ndih ye, ne ntuche ye van tenahn. ¹⁶Cuahn che renevah necun Dendiohs ama vedino ne, renevah necun ye nducuahn. Atihnocano tun ihyan ndico che chihco ndata ye ihyan nación yahn Israel. Nducote a ndeva Dendiohs ihyan chahn ne, namin ndeva ye nducoyaca ndata yahn ye.

¹⁷Che chacondah vedame Dendiohs ama yahn ihyan nación yahn Israel ne, anduhneca ndete che chindudo ye dune ama yahn olivo ndah. Che ndeva ye nchuhn, ihyan nación chenahn ne, anduhneca ndete che chetah ye dune yahn olivo chano, ndahco menun ye nan che chica ye dune yahn olivo ndah me, cava che a nan duto yahn olivo ndah me cuhnde cue yahn. ¹⁸Ate hua din yade nchuhn cava chemin. Cuenecahco ne te a ihyan ndico yahn ihyan chahn che tihyon yune ye nchuhn che chitahno ne, ndeva Dendiohs nchuhn.

¹⁹Co rahco nchuhn te yahn che tahque ndah ihyan ne che co ihyan chahn che ndeva Dendiohs nchuhn menun ye, chacondah vedame ye ihyan. ²⁰Cuaco che ndeva Dendiohs nchuhn menun ye, ate hua din yade ne cava chemin. Tahque

ndah ne, cuihco ne cudado. Cuenecahco ne te a yahn che hua chitahno ihyan chahn che chacondah vedame Dendiohs ihyan. Namin cuacondah vedame ye nchuhn, ndete che cuahcotahn ne yahn ye. ²¹Tihca, te nducote chacondah vedame Dendiohs ihyan chahn, andahre ihyan yahn ye, nde tahque nun cuacondah vedame ye nchuhn, ndete che cuahcotahn ne yahn ye. ²²Condihe nchuhn. Dendiohs ne, nduhca che ndah ye ne, tihca cahnda ye. Chi tan ye nduco ihyan chahn che chahcotahn ye yahn ye, ne din yahino ye nchuhn che dinahn ne yahn ye. Ndete che quendi ne dinahn ne yahn ye ne, quendi ye din yahino ye nchuhn. Ndete che hua ne, namin cuacondah vedame ye nchuhn. ²³Ihyan chahn ne, ndete che nto ino ye che chahcotahn ye, ndaconan cotahno ye ne, ndeva Dendiohs ihyan, te quenán cuma ye vederihquentiyon che ndeva ye ihyan. ²⁴Tihca, te nducote ndeva Dendiohs nchuhn, andahre hua ihyan yahn ye nchuhn, nde tahque nun ndeva ye ihyan chahn, te ihyan yahn ye ihyan.

Va che ndevahn nducoyaca ihyan nación yahn Israel

²⁵Dihnó, cava che hua din yade ne, duche rino ne ihyan nación yahn Israel ne, te cuandé nchuhn ama ndudo che nde hua devano ihyan ro menan. Ihyan chahn ne, yahn ye din cheche Dendiohs chedave yahn ye, nde conan cotahno ihyan nación chenahn che a va cade che cotahno ye. ²⁶Cuihno min ne, ndedevahn Dendiohs nducoyaca ihyan nación yahn Israel nduhca che a ndirun nan Ndudo yahn ye tuhca:

Nchuhn ihyan nación yahn Israel, ndata yahn Jacobo,
tendahnún ama ihyan nación yahn ne, ndedevahn ye
nchuhn,

din ye che nto ino ne nunde yahn ne.

²⁷Tuhme nchahcó nunde yahn ne,
conahntrato che a chihco cadé nduco ne.

²⁸Ihyan nación yahn Israel ne, hua dinahn ye vederihquentiyon yahn Dendiohs, chahcotahn ye yahn ndudo ndah yahn Dihvo vo Jesucristo. Nduco chemin ne, ndaca yune che ndevahn ihyan nación chenahn. Ate Dendiohs ne, a tendahnun ye ihyan ndico yahn ihyan chahn, ne chemin che yahino ca ye ihyan. ²⁹Tihca, te Dendiohs ne, nducuahn che rihco cade ye ne, redinahn ye. Vederihquentiyon che rech ye

ihyan ne, hua renevih ye. Ihyan che renevin yahn ye ne, hua racondah vedame ye ihyan. ³⁰Nchuhn ihyan nación chenahn ne, chahcotahn ne yahn Dendiohs ro man, ate man ne, quenah vahino ye nchuhn yahn che rahcotahn ihyan nación yahn Israel yahn ye. ³¹Rahcotahn ye yahn Dendiohs man ro cuh, ate nduhca che quenah vahino Dendiohs nchuhn ne, namin conan vahino ye ihyan chahn. ³²Tihca, te Dendiohs ne, din cheche ye chedave yahn nducoyaca ihyan iyehense, cava che cuahtendihco nducoyaca ye nunde, ndaca yune che conan vahino ye ihyan.

³³¡Ama devano Dendiohs! ¡Ama ndahca vederendedecadino yahn ye! ¡Nde hua renan retumacadino vo nducuahn che rihco cade ye man, che redin ye man! ³⁴Nde ama ihyan hua retumacadino ye che rendedecadino Dendiohs. Nde ama ihyan hua tuno vededevano yahn ye. ¿Dehra che cacuahn ye Dendiohs? ³⁵Nde ama ihyan ametah dehva yahn ye che cah ye Dendiohs. Ndiyu che quendiico Dendiohs yahn ihyan che redin ye che ndah nduco ye, te che renan vahino ye ihyan. ³⁶Tihca, te nducuahn dehtenduh che va ne, a yahn Dendiohs, a man ye dendah ye. Ndeva vo yavenan ye cuahn dama. Tihca co.

Nduhca che va che cuahtechica ihyan che ritahno ye Dihvo vo Jesucristo

12 ¹Dihnó, nducote quenah vahino Dendiohs nchuhn, nedin yahn ye nchuhn ne, ricá nchuhn che numacuahn vederihquentiyon yahn Vaco Ndah yahn ye ndahco ne chedave yahn ne tah ye nduhca ama vedino ndah che conan ino ye. ²Hua quendi nchuhn vedeyeno yahn man ne. Tahque ndah ne ne, condahcorun ne vederendedecadino yahn ne cava che runecade cuahtechica ne nduhca che nahn Dendiohs.

³Nducote yahino Dendiohs u, te ye vederihquentiyon u ne, riyahvé nchuhn che hua ndedecadino ne che ama devano ne, chuhnan ne vederihquentiyon che chenan cuma ne. Tahque ndah ne, runecade ndedecadino ne, ne codin chahtino ne Dendiohs, codinahn ne tunoca vederihquentiyon che nte ye queri ama ne. ⁴Ihyan ne, tah ye man, cah ye man, ndutinan ye man ne, a vih vih ntiyon che redin queri ama. ⁵Atihnoqa uvo.

Andahre ama yahn uvo che ritahno vo Dihvo vo Jesucristo, ate ama cuān no ndi vo nduco vih. Ate va te va ntiyon che redin queri ama vo man, rendotenan vo vih man.

⁶Dendiohs ne, te ye ama ama nan vederihquentiyon queri ama vo, ne nahn che runecade dinahn vo. Duh ihyan che quenan cuma ye vederihquentiyon che cuahndudo ye ndudo che te Dendiohs ne, cuahndudo ye anduhneva che cah Dendiohs, hua tihdenan ye che cahma ye. ⁷Duh ihyan che quenan cuma ye vederihquentiyon chete yaco ne, runecade dinahn ye. Me ihyan che quenan cuma ye vederihquentiyon che cacuahñ ye Ndudo yahn Dendiohs ne, runecade cacuahñ ye. ⁸Me ihyan che quenan cuma ye vederihquentiyon che yahve ye ihyan chenahn ne, yahve ye ihyan nduco ndah. Me ihyan che cah ye vedino ne, cah ye numacuahn chedave yahn ye. Me ihyan che ndinan ye chete yaco ne, cahcantiyon ye nduco cuḁado. Me ihyan che din ye vedevahino ne, din ye numacuahn chedave yahn ye.

⁹Cuahtenan cuma nchuhn vedeyahino numacuahn chedave yahn ne. Hua din ne dehtenduh che chihnga; codin ne che ndah. ¹⁰Codin ne cuande anduhneca ndete che dihno ne vih. Codin yahino ne vih, cuenevahñecun ne vih.

¹¹Codin ne ntiyon yahn Dihvo vo Jesucristo numa ino ne, hua din dañde ne.

¹²Numacuahn vedeyeno cuahtenan ino ne che dinahn Dendiohs ndudo yahn ye nduco ne. Codin chahtino ne cuahn che chuhrihn ne. Covah ne cuahn ḁama.

¹³Cuenan ne dihno vo che va vederetahn yahn ye. Cuenevahñecun ne ihyan che nda ye ndevaco ne.

¹⁴Ihyan che redin tan ye nduco ne ne, ndotenan che cahva ne nduco ye ne, cuica ne Dendiohs che din ye che ndah nduco ye.

¹⁵Cuinduco ne ihyan che yeno ye man, ihyan che ri ndache ye man, cuenecah yan ne chedave yahn ye.

¹⁶Ndahca cuahtenan ne nduco vih. Co ḁama ne nduco ihyan che necun ye. Hua din yade ne man, hua din cun ne man.

¹⁷Hua ḁama co ne nduco ihyan che redin tan ye nduco ne. Runecade cuahtenan ne nan nducoyaca ihyan. ¹⁸Cuihco nchuhn cuḁado nan nducuahn, cava che hua ndaca yune che co tan ihyan nduco ne. ¹⁹Dihnó che yahinó nchuhn, hua

cuahatenun ino ne vedetān nduco vih. Tahque ndah ne ne, condahco ne tah Dendiohs cava che techecade ye, te a ihyan min che va che techecade ye nduhca che a ndirun nan Ndudo yahn ye: “U quenán cumá che dín castigo ihyan nunde. U ndahco menún yahn ye.” ²⁰Namin a ndirun: “Hua cuahtenun ino nchuhn vedetān nduco ihyan che redin tān ye nduco ne. Tahque ndah ne ne, codin ne che ndah nduco ye. Ndete che cuico ye ne, cah ne che cheh ye, ndete che yaca ye ne, cah ne che cuh ye, te nduco chemin ne, din ne che co cuihnan ye, ne nto ino ye.” ²¹Hua cuahnecun ne che denda ne, din vedetān yahn ne. Tahque ndah ne ne, codin ne che ndah cava che hua denda ne.

13 ¹Nducoyaca nchuhn ne, codinahn ne yahn ihyan ndinan man, intiyahn yahn yan vaco ne man, te nducoyaca intiyahn ne, a Dendiohs necah ye vederihquentiyon ihyan, chaconahn ye ihyan nan ntiyon. ²Chemin che ihyan che cuahcotahn ye yahn intiyahn ne, va che co ye castigo, te nde yahn Dendiohs rahcotahn ye, yahn che ihyan min raconahn ye ihyan chahn nan ntiyon. ³Ihyan che runecade vatechica ye ne, ametah deh cuande che din vah ye intiyahn. Ate ihyan che chendihco ye nunde ne, ihyan chahn che vah ye intiyahn. Ndete che hua nahn cuahtenun ndeh ne yahn intiyahn ne, runecade cuahtechica ne. Tuhme co yeno ye nduco ne, ⁴te raconahn Dendiohs ihyan nan ntiyon cava che ndah yahn ne. Ate ndete che rahcotahn ne yahn intiyahn ne, tuhme che cuaco, din vah ne ihyan, te a man Dendiohs cah ye vederihquentiyon ihyan, cava che din ye castigo ihyan che chendihco ye nunde. ⁵Va che dinahn vo yahn intiyahn, ndiyu yahn che vah vo che co vo castigo, ate yahn che a devano vo che tihca nahn Dendiohs. ⁶Nducote renevahncun ne Dendiohs ne, va che nedihve ne cade iyo yahn ne che rica intiyahn. Tihca, te a man Dendiohs raconahn ye ihyan chahn nan ntiyon, ne a min chenan ye ro ro.

⁷Nducoyaca intiyahn che caca ye cade iyo yahn ne ne, cuenedihve ne. Nducoyaca ihyan ndinan man, intiyahn man ne, cuenevahncun ne ihyan man, codin yahino ne ihyan man. ⁸Cuenedihve ne nducuahn che chendihco ne yahn ihyan. Codin yahino ne nducoyca ihyan, te ihyan che redin yahino ye ne, redinahn ye vederihquentiyon yahn Dendiohs

⁹che ndirun tuhca: “Hua din duche yehn che a nihnevaque. Hua cahne ihyan. Hua doque. Hua ndere cacueh dame nunde ihyan. Hua din idihye nduco dehtenduh yahn ihyan.” Nducuahñ vederihquentiyon che tuhchan ne, rendo dama ñan vederihquentiyon cuh: “Codin yahine nducoyaca ihyan nduhca che yahine man di.” ¹⁰Ihyan che yahino ye ihyan chenahn ne, hua ndere redin ye nduco ye. Chemin che cuahn che yahino vih vo ne, redinahn vo vederihquentiyon yahn Dendiohs.

¹¹Avane ne, a devano nchuhn te cahnda ro che vato vo. Cuahteyan ne, te a cochi nino ro che ndedevahn Dendiohs uvo. ¹²A nun cuihno ro cuh che ndere redin ihyan, a nun ndeva Dendiohs uvo. Chemin che nahn che hua din vo dehtenduh che chihnga. Nahn che cuahteyan vo nduhca sandado che a vateyan se, nda se dehtenduh che ndedevahn nduco se sahn. ¹³Nahn che ama runecade cuahtechico vo nduhca che rahtechica ihyan che renahn ye. Hua cocoh vo man, hua cuahto vo vihco vedecoh man, hua ndere cuahtechico vo, cuahtendihco vo nunde man, hua cuahte canda vo man, hua din ve vo yahn vih man. ¹⁴Ndotenan che cuahtechico vo vedeyeno yahn man vo ne, cochahtino vo Dihvo vo Jesucristo, runecade cuahtechico vo nduhca che nahn ye.

Hua ndahca che ndahchenan vo vih

14 ¹Me dihno vo che metah conahn ndah ye vederihquentiyon yahn Dendiohs ne, cuenevahñecun ne ihyan. Hua cuhma chende ne nduco ye yahn vederihquentiyon yahn Dendiohs che hua dama renahn ne nduco vih. ²Vate dihno vo che ritahno ye che ndiyu nunde che cheh ye nducuahñ ñan dehtenduh. Namin vate dihno vo che metah conahn ndah ye vederihquentiyon yahn Dendiohs, ne rahco ye che cuahtendihco ye nunde ndete che cheh ye yute. ³Dihno vo che hua dehve rahco ye, reh ye nducuahñ ñan dehtenduh ne, hua ndahca che ndahchenan ye dihno vo che vahino ye cheh ye yute. Namin dihno vo che hua reh ye yute ne, hua ndahca che ndahchenan ye dihno vo che reh ye nducuahñ ñan dehtenduh, te a nedin yahn Dendiohs ihyan chahn. ⁴Hua ndahca che cuih nunde ne yahn mozo yahn tama ihyan, te ndete che ndahca quenán mozo me nduco dihve ye,

o hua ne, chemin ne, a man dihve ye rano cuande yahn ye. A namin no tun ihyan che ritahno ye Dihvo vo Jesucristo, te a man Dihvo vo nda cuande yahn ye ihyan.

⁵Namin vate dihno vo che ndihco vih ye ro che tahque renevahneecun ye. Vate tun dihno vo che rahn ye che a dama no nducuahn ro. Queri ama ihyan ne, va che ndedecadino ndah ye cha che ndahca din ye cava che cuhndeman ino ye nan Dendiohs. ⁶Ihyan che renevahneecun ye ama ro ne, rendeva ye yavenan Dihvo vo Jesucristo. Atihnoqa ihyan chenahn, te andahre hua renevahneecun ye ro min ne, ate namin nduco ye rendeva ye yavenan Dihvo vo. A namin no tun ihyan che hua vahino ye reh ye nducuahn nan dehtenduh, te nducote renecah ye nundihve cuahn Dendiohs cava ne, rendeva ye yavenan Dihvo vo. Atihnoqa ihyan che rahco ye che hua ndahca che cheh ye ama o nan dehtenduh, te nducote renecah ye nundihve cuahn Dendiohs cava dehtenduh che reh ye ne, namin nduco ye rendeva ye yavenan Dihvo vo.

⁷Ndiyuh chenahn man vo che vato vo, nde huane chenahn man vo che coh vo. ⁸Che vato vo ne, a Dihvo vo Jesucristo che rihquentiyon ye uvo, ne che coh vo ne, a ihyan min che ndeva ye uvo. Chemin che a vato vo, o coh vo, a yahn ye uvo, ⁹te a chih ye, ne ndaconan ntuche ye cava che co yahn ye nducoyaco vo, a chenduche vo, o a ndih vo.

¹⁰Hua ndahca che cua cuando vo dihno vo, ndahchenan vo ihyan, te Dihvo vo Jesucristo ne, va che techecade ye yahn nducoyaco vo, ¹¹nduhca che a ndirun nan Ndudo yahn Dendiohs tuhca:

Rahn Dihvo vo Dendiohs: “Numacuahn vederihquentiyon yahn rahn ri nchuhn te va che nevahneecun nducoyaca ihyan u, ndeva ye yavenan.”

¹²Nduco tihca ne, a devano vo che queri ama vo ne, va che necah cuando vo Dendiohs yahn dehtenduh che redin vo.

Hua din vo che co ndache dihno vo

¹³Nducote a Dendiohs nda cuande yahn ye uvo ne, hua redin yahn che quendi vo cahma nunde vo yahn vih. Tahque ndah ne, ndedecadino vo, te hua ndahca che cava dehtenduh che redin vo, ndaca yune che co ndache dihno vo, cuahtendihco

ye nunde. ¹⁴Nduhca che ritahnó Dihvo vo Jesucristo ne, a devano cuaco te ametah nde ama nan dehtenduh che reh ihyan che din che cuahtendihco ye nunde. Ate ndete che vate ihyan che vahino ye cheh ye ama o nan dehtenduh ne, tahque ndah hua cheh ye, te ndete che cheh ye ne, chihnga co ino ye, ne nduco chemin condihco ye nunde. ¹⁵Ndete che cava dehtenduh che reh nchuhn rendaça yune che to ino dihno ne ne, rihco ro ne che hua chenah cuma ne vedeyahino. Cuihco ne cudado nan nducuahn che reh ne. Hua ndahca che cava chemin ndaca yune che to ino dihno ne, condihco ye nunde, te namin cava ihyan min che chih Dihvo vo Jesucristo. ¹⁶Cuihcoman ne queri ama dehtenduh che redin ne, andahre devano ne che ndah, ndete che cava chemin che ndaca yune che chihnga co ino ihyan chenahn. ¹⁷Tihca, te che nguahco yuhn vo nan Dendiohs ne, ndiyu yahn dehtenduh che reh vo man, rih vo man. Che tahque nahn ye ne, che numacuahn vederihquentiyon yahn Vaco Ndah yahn ye, runecade cuahtenan vo man, ndahca cuahtenan vo nduco vih man, cuahtenan cumo vo vedeyeno man. ¹⁸Nducoyaco vo che ritahno vo Dihvo vo Jesucristo ne, nahn ye che tihca dinahn vo. Ndete che tihca dinahn vo ne, nedin yahn Dendiohs uvo man, nevahnecon nducoyaca ihyan uvo man.

¹⁹Din vo cuande, ne din nun ino vo cava che ndahca cuahtenan vo nduco vih man, conan vih vo man, cotahno vo numa ino vo Dihvo vo Jesucristo man. ²⁰Cuihco nchuhn cudado nan nducuahn che reh ne, cava che hua ndaca yune che to ino dihno vo che ritahno ye Dihvo vo Jesucristo. Cuaco che nducuahn dehtenduh che reh vo ne, hua redin che rahtendihco vo nunde. Ate nahn che cahco vo cudado che hua cava chemin to ino dihno vo, te ndete che tihca ne, cuahtendihco vo nunde. ²¹Ama nunde ndete che yahn che reh vo yute, o rih vo vino, o redin vo tama nan dehtenduh, ndaca yune che co ndache dihno vo, to ino ye. ²²Uvo che devano cuaco vo che nducuahn dehtenduh che reh vo ne, hua redin che rahtendihco vo nunde ne, hua nahn che cuacotuhn vo ndudo yahn chemin van dihno vo chenahn, te denan chihnga co ino ye. Nahn che man no vo devano vo. Namin Dendiohs ne, a devano ye. ¡Ama ndah ro yahn ihyan che a devano cuaco ye che hua rahtendihco ye nunde cava dehtenduh che reh ye!

²³Me ihyan che ritahno ye che hua ndahca che cheh ye ama nan dehtenduh, ne reh ye ne, rahtendihco ye nunde yahn che man ye chihnga ri ino ye. Tihca, te nducuahn dehtenduh che redin vo che o rendedecadino vo ne, rahtendihco vo nunde.

Cuahtenan cumo vo vedechahtino cava ihyan chenghn

15 ¹Uvo che a renahn vo vederihquentiyon yahn Dendiohs ne, nahn che din chahtino vo yahn dihno vo che ametah conahn ndah ye, te hua ndahca che din vo dehtenduh che ri yeno man vo, ndete che cava chemin co ran ye. ²Queri ama vo che a renahn vo vederihquentiyon yahn Dendiohs ne, nahn che din vo nducuahn cava che ndah yahn dihno vo che hua ndah renahn ye, nahn che conan vo ihyan cava che conahn ndah ye. ³Tihca, te Dihvo vo Jesucristo ne, hua nuhn ye che ndah yahn man ye, nduhca che a ndirun nan Ndudo yahn Dendiohs tuhca: “Vedetan yahn ihyan che hua ri rendihche ye ndih ne, andahre ndiyu cava che ndah yahn man, ate u ntuma chihve nducuahn.” ⁴Nducuahn che a ndirun nan Ndudo yahn Dendiohs nde a ran me ne, a ndirun cava che cochahtino vo Dihvo vo Jesucristo, necah yan vo chedave yuhn vo, ne cuahtenan ino vo che ndeva ye uvo. ⁵⁻⁶Dendiohs, Chida Dihvo vo Jesucristo, ihyan min che redin ye che rahtenan cumo vo vedechahtino, renecah yan ye chedave yuhn vo ne, din ye che ndahca cuahtenan nchuhn nduco vih, nduhca che nahn Dihvo vo, cava che dama ndeva nducoyaco vo yavenan ye.

Chetuhn ndudo ndah yahn Dihvo vo Jesucristo van ihyan naci3n chenghn

⁷Nduhca che nevahnecon Dihvo vo Jesucristo nchuhn ne, tihca cuenevahnecon ama tama ne vih, cava che cua cuande ihyan chenghn che tihca redin ne, ne ndeva ye yavenan Dendiohs. ⁸Cuenechco nchuhn te Dihvo vo Jesucristo ne, chinan ye ihyan naci3n yahn Israel, chihco ro ye che dinahn Dendiohs ndudo yahn ye che cah ye ihyan ndico yahn ihyan chahn. ⁹Namin tihyon yune ye ihyan naci3n chenghn che ndeva ye yavenan Dendiohs yahn che quenah vahnino ye ihyan. Nducote Dihvo vo Jesucristo ne, chinan ye ihyan naci3n yahn Israel man, ihyan naci3n chenghn man ne, a

ndero ndi che nahn che nevahne^{cun} ihyan chahn vih. A devano vo te ihyan nación chenahn ne, va che co cuande ye van ihyan yahn Dendiohs, te chemin ne, a ndirun nan Ndudo yahn Dendiohs tuhca:

Ndevá yavenan ne van ihyan nación chenahn, catá himno, ndonán ndih.

¹⁰Namin ndirun:

Nchuhn ihyan nación chenahn, cuando dama ne nduco ihyan yahn Dendiohs, cuendeva ne nduco vih yavenan ye.

¹¹Namin ndirun:

Nchuhn ihyan nación chenahn, cuendeva nducoyaca ne yavenan Dihvo vo Dendiohs.

¹²Namin dirun ihyan profeta Isaías:

Nan ndata yahn Isaí quenda^h ama ihyan che cahcantiyon ye nación chenahn, cochahtino ihyan chahn ihyan.

¹³Dendiohs, ihyan min che redin ye che chenano ino vo ihyan ne, din ye che cotahno ne Dihvo vo Jesucristo, co yeno ne, ne ndahca^h cuahtenan ne, cava che numacuahn vederihquenti^{yon} yahn Vaco Ndah yahn ye cochahtino ne ihyan.

¹⁴Dihno, retumacadinó te ama ndah ihyan nchuhn man, ama chenano cuma ne vededevano man, nde devano cacuahn ne vih. ¹⁵Andahre tihca^h ne, dirun yahn ne cava che ntiyon yan yahn ne vederihquenti^{yon} yahn Dendiohs, nde ama dito yahvé nchuhn yahn ama o nan. Tihca^h din, te numacuahn vedeyahino tendahnun Dendiohs u, ¹⁶che din ntiyon yahn Dihvo vo Jesucristo van ihyan nación chenahn, cuahndudó ndudo ndah yahn ye, cava che cotahno ihyan chahn, ne ndeva ye ihyan, cahco vih Vaco Ndah yahn ye ihyan.

¹⁷Ama yenó che ama ndahca^h rinahn ntiyon yahn Dendiohs che redin, yahn che rinan Dihvo vo Jesucristo u. ¹⁸Nde hua cahquinó cahmá che a man che redin ntiyon min, te a Dihvo vo Jesucristo che redin ye. A ihyan min che redin ye che rinahn ntiyon che redin, ritahno ihyan nación chenahn. Nan nducuahn che rahndudó man, che redin man ne, a man ye retihyon yune ye u. A yahn chemin no che te cuandé nchuhn. ¹⁹A ihyan min che redin ye vederihno man, redin ye che quenano cumá vederihquenti^{yon} yahn Vaco Ndah yahn

Dendiohs man. Chemin che numachahte, nde yan Jerusalén, nde yahn yahn Ilírico, chacotúhn ndudo ndah yahn Dihvo vo Jesucristo. ²⁰Nduco tihcá ne, din nun inó che quechicá rahndudó ndudo ndah yahn Dihvo vo Jesucristo van ihyan che ametah cahnevan ye nde ama yune, cava che hua condá mendáhn, cuahndudó nan che a nedin tama ca ihyan ntiyon. ²¹Tihcá dín, cava che conahn nduhcá che a ndirun nan Ndudo yahn Dendiohs tuhca:

Ihyan che hua devano ye ne, cahnevan ye ndudo yahn ihyan min che a va cade che dechuh Dendiohs, ne conahn ye.

Pablo ne, nahn cahn ye yan Roma

²²Nducote rahndudó ndudo yahn Dihvo vo Jesucristo van ihyan che metah cahnevan ye ne, chemin che nde meniyon ametah co chí quendihcheró nchuhn. ²³Ate nducote ama chacotúhn ndudo yahn Dihvo vo Jesucristo numachahte yahn cuahnguh man, nducote a ama ndeh nduyo nahn chí quendihcheró nchuhn man ne, ²⁴chemin che quenán inó che conán neve ro nduco nchuhn yan vaco ne, ne cuahn che cahn yahn yahn España ne, conan ne u, ndaca che chuhnún yune. ²⁵⁻²⁶Numanahn min ne, cahn yan Jerusalén, te dihno vo che vate ye yahn yahn Macedonia man, Acaya man ne, a nedin dama ye ama vedino cava dihno vo che metah dehva yahn ye che vate ye yan min, ne va che ngú yahn ye. ²⁷Dihno vo ihyan nación chenahn chahn ne, ama yeno ye, din dama ye vedino min. Tihcá redin yahn che din ye, te a cava ihyan nación yahn Israel che ndaca yune che chitahno ye Dihvo vo Jesucristo, ndevahn ye, ne ndahcá che conan ye ihyan chevah van ihyan nación yahn Israel che vate ye yan Jerusalén. ²⁸Cuahn che a dináhn ntiyon min, necáh vedino me tah ihyan chahn ne, va che chüh yan vaco nchuhn, cahn yahn yahn España. ²⁹A devano cuacó te cuahn che ndá tan ne, numacuahn vederihquentiyon yahn Dihvo vo Jesucristo cuahndudó ndudo yahn ye, ne ama cochihve yahn ne.

³⁰Dihno, numacuahn vederihquentiyon yahn Dihvo vo Jesucristo man, numacuahn vedeyahino yahn Vaco Ndah yahn Dendiohs man, ricá nchuhn che conan ne u, covah ne numa ino ne, ³¹cava che ndedevahn Dendiohs u tah ihyan

che hua ritahno ye che vate ye estado yahn Judea. Namin cava che, dihno vo che vate ye van Jerusalén ne, nevahnecon ye vedino che quendá. ³²Namin cava che cuahnecon ye che numacuahn vedeyeno ndá van vaco ne, necah van ne chedave yáhn. ³³Dendiohs, ihyan min che redin ye che ndahca rahtenan vo, conduco ye nducoyaca nchuhn. Tihca co.

Renecah Pablo Dendiohs dihno vo

16 ¹Ricá nchuhn cava cahvo vo Febe, ihyan min che ndi cuande ye van intiyahn yaco che vate ye van Cencrea, ²che nevahnecon ne ihyan nduhca che nahn Dihvo vo Jesucristo che nevahnecon vo ihyan yahn ye. Cuenan ne ihyan nan adecodehno vederetahn yahn ye che va, te man ye ne, ndinan ye ama yahn ihyan. Namin chinan ye u.

³Che cuande yáhn ne, cuenecah ne Dendiohs Aquila nduco ihyan ndahta yahn ye Priscila. Ihyan chahn ne, combiero yáhn nan ntiyon yahn Dihvo vo Jesucristo, ⁴nde chihco mendahn ye ihyan cava che ndedevahn ye u. U man, nducoyaca dihno vo nación chenahn man ne, renecah nuhn nundihve cuahn ihyan chahn. ⁵Namin cuenecah ne Dendiohs nducoyaca dihno vo che rendo dama ye ndevaco ihyan chahn, rendeva ye yavenan Dihvo vo Jesucristo. Namin cuenecah ne Dendiohs Epeneto, amigo yáhn che yahinó. Ihyan min che menan ndita chitahno ye Dihvo vo Jesucristo van ihyan che vate ye yahn yahn Acaya. ⁶Namin cuenecah ne Dendiohs María, ihyan min che ama nedin ye ntiyon yahn Dihvo vo Jesucristo van nchuhn. ⁷Namin cuenecah ne Dendiohs ihyan yáhn, Andrónico man, Junias man, ihyan chahn che dama chahtenun ye vacoyahn nducó. Ihyan chahn ne, tahque menan chitahno ye Dihvo vo Jesucristo che co u, ne van ihyan apóstol ne, ama yahinó dihno vo ihyan.

⁸Namin cuenecah ne Dendiohs dihno vo Amplias che yahinó ihyan. ⁹Namin cuenecah ne Dendiohs Urbano, ihyan min che nduco ye rinan ye nuhn nan ntiyon yahn Dihvo vo Jesucristo. Namin cuenecah ne Dendiohs Estaquis che yahinó ihyan. ¹⁰Namin cuenecah ne Dendiohs Apeles, ihyan min che ndiquendah ndah ye che ritahno ye Dihvo vo Jesucristo. Namin cuenecah ne Dendiohs ihyan ndevaco Aristóbulo. ¹¹Namin cuenecah ne Dendiohs Herodión, ihyan

yān vācō. Namin cuenecāh ne Dendiohs ihyan ndevāco Narciso che ritahno ye Dihvo vo Jesucristo. ¹²Namin cuenecāh ne Dendiohs Trifena mān, Trifosa mān, ihyan chahn che namin redin ye ntiyon yahn Dihvo vo. Namin cuenecāh ne Dendiohs cahvo vo Pérsida che yahino vo ihyan. Ihyan min ne, ama nedin ye ntiyon yahn Dihvo vo. ¹³Namin cuenecāh ne Dendiohs dihno vo Rufo che āma ndah redin ye ntiyon yahn Dihvo vo. Namin cuenecāh ne Dendiohs chaco ye, ihyan min che rihno ihyan nduhcā chacō. ¹⁴Cuenecāh ne Dendiohs Asíncrito mān, Flegonte mān, Hermas mān, Patrobas mān, Hermes mān, dihno vo chenāhn che nduco ye ihyan chahn mān. ¹⁵Namin cuenecāh ne Dendiohs Filólogo mān, Julia mān, Nereo nduco cahve ye mān, Olimpās mān, dihno vo chenāhn che nduco ye ihyan chahn mān.

¹⁶Nduco vedino vedeneacun cuenecāh ne Dendiohs vih che cuande yāhn. Cuendeva ne Dendiohs yahn dihno vo che vate ye nducuahn yān.

¹⁷Dihno, ricā nchuhn che cāhco ne cudādo ihyan che redin ye che ndeh cuān ri dihno vo mān, che redin ye che rahtendihco ye nunde mān, te rahcotāhn ihyan chahn yahn Ndudo yahn Dendiohs che a chahn nchuhn. Cuihcomān ne ihyan chahn, ¹⁸te ndotenan che redin ye ntiyon yahn Dihvo vo Jesucristo ne, riquendi ye vedeyeno yahn mān ye, rihncheh ye ihyan che necun ye nduco ndudo yāde. ¹⁹Yenō cāva nchuhn, te āma va ndudo yahn ne che redinahn ne vederihquentiyon yahn Dendiohs. Nahn che cuahteyān ne cāva che din ne dehtenduh che ndah, ne cāhcomān ne dehtenduh che hua ndah. ²⁰Dendiohs, ihyan min che redin ye che ndāhcā rahtenan vo ne, nun din ye che ndāhco ndiya nchuhn vederihquentiyon yahn chundah. Dihvo vo Jesucristo din yahino ye nchuhn.

²¹Cuendeva nchuhn Dendiohs yahn Timoteo, sāhn min che rinduco se u nān ntiyon yahn Dendiohs. Namin cuendeva ne Dendiohs yahn ihyan yāhn, Lucio mān, Jasón mān, Sosípater mān.

²²U Tercio, che dirún cāca cuh che cuande yahn Pablo ne, namin nté Dendiohs nchuhn numacuahn vedeyahino yahn Dihvo vo Jesucristo.

²³Cuendeva nchuhn Dendiohs yahn Gayo, ihyan min che renevahnecun ye u nduco nducoyāca dihno vo ndevāco ye.

Namin cuendeva ne Dendiohs yahn Erasto, tesorero yahn yan. Namin cuendeva ne Dendiohs yahn dihno vo Cuarto.

²⁴Dihvo vo Jesucristo din yahino ye nducoyaca nchuhn. Tihca co.

Ndeva Pablo yavenan Dendiohs

²⁵Man ne, ndeva nducoyaco vo yavenan Dendiohs, ihyan min che co din ye che cotahno nchuhn numa ino ne ndudo ndah yahn Dihvo vo Jesucristo che rahndudó. Ndudo ndah min ne, hua devano ihyan a rahn me, ²⁶te Dendiohs che va ye cuahn dama, chihquentiyon ye ihyan profeta che dirun ye nde a rahn me, ne cade cah ye, checadino nducoyaca ihyan iyehmse cava che cotahno ye.

²⁷Nducote ritahno vo Dihvo vo Jesucristo ne, cuahn dama ndeva vo yavenan ama no Dendiohs, ihyan min che ama devano ye. Tihca co.